

Ekwo

JIOSHUWA

Chipfu ezi Jioshuwa ozi

1 ¹Tɔbudu iya bɔ; onye-ozu Chipfu, bɔ Mosisu nwuhuchaepfo; Chipfu sɔ Jioshuwa nwa Nunu, bɔ onye shi anɔduje eyeru Mosisu ɛka: ²“Onye-ozu mu, bɔ Mosisu bɛ nwuhuwaru nɔ. Nta-a bukwa g'i gbeshi; g'unu lɛ ndu Ízurelu l'ophu je adaa ɛnyimu Jiɔdanu-a bahɔ l'alì ono, mu abya phɛ anunu ono. ³Iphe, bukpo ɛka unu zɔru ɔkpa bɛ mu a-nukota unu, bɔ iya bɔ gɛ mu pfuru iya Mosisu. ⁴Alì unu a-gbɛ l'echiegu nɔdu jasɔ l'úbvú úbvú Lébanonu l'ɛka ono. Lɔ gbɛkwapho l'oke-ɛnyimu Yufurétisu nɔdu je akpaa l'oke eze-ɛnyimu, nɔ l'uzo ɛnyanwu-arìba. Alì ndu Hetu l'ophu ayìkwaru iya phɔ. ⁵Ọ tɔ dukpoda onye byaru adɔ ike pfuchia ngu ɔzo gbiriri jasɔ teke ì-nɔ-beru. Ọ ɛgube ono, mu shi swiru Mosisu ono bɔ gɛ mu e-swikwaru ngu phɔ; ophu mu abyadɔ aha ngu nwɛkinyi ngu; tɛme ophu mu agwɔbekwa ngu.

⁶“G'obu shihu ngu ike; gɛ ndzɔ ba agukwa ngu; noo kɛle ọo gɔbedua bɛ e-duru ndu-a je g'ɛphe je anata alì ono, mu riru nna phɛ oche angɔ lɛ mu a-nɔ phɛ ono. ⁷Ọo ɛpho g'obu shihukwa ngu ike; gɛ ndzɔ ba agukwa ngu agugu ophu. Ọo g'i kwabɛ ɛnya dobekɔta ekemu ono, onye-ozu mu, bɔ Mosisu nuru ngu ono. Ta agbakɔtakwaru iya azɔ; ophu i yekwaru iya ɛka lanɔ. Ọo ya bɔ g'upete agbajɛru ngu l'ɛkameka i jekporu. ⁸Ta ahakwa ɛkwo ekemu ono g'ɔ gbatehu ngu l'ɔnu. Rije iya l'oriri eswe l'enyashi; ọo ya bɔ l'i-leta ɛnya mekɔtaje iphemiphe, e deru l'ime iya. Ọo ya bɔ; g'eso etsoje ngu l'iphemiphe, iimekpɔo ememe; upete agbakwaaru ngu phɔ. ⁹?Tɔ bunaa mbɛdua sɔru g'obu shihu ngu ike? Gɛ ndzɔ ba agushi ngu; ophu meji atɔfukwa ngu. G'ɔ tɔ dukwa teke ì-la azɔ azɔ. Noo kɛle Chipfu, bɔ Chileke ngu bɛ e-swiru ngu nɔ l'ɛkameka iijekpo.”

¹⁰Jioshuwa bya ezia ndu-ishi ndu Ízurelu sɔ: ¹¹“Unu jedzuru ɛka ndu Ízurelu kpɔberu ɔlo-ɛkwa phɛ je epfuaru phɛ g'ɛphe kwakɔbe nri eriri phɛ ree; kɛle o ghuduru ujiku ɛto; unu adaa ɛnyimu Jiɔdanu je anata alì ono, Chipfu bɔ Chileke unu a-nɔ unu; g'ɔ buru k'unu ono.”

¹²O be l'okpa-ipfu Rúbenu; waa okpa-ipfu Gadu; waa unwunna okpa-ipfu Manáse, e keru ebo; Jioshuwa sù phe: ¹³“Unu nyatakwa ekemu, onye-ozì Chipfu, bú Mósìsù tũru nũ unu g'unu meje! Chipfu, bú Chileke unu abya eme g'unu tũta unme; woru alì-a nũ unu g'ò buru k'unu. ¹⁴Oo ya bú l'unyomu unu; waa unwegirima unu; me iphe-edobe unu be a-nodu l'alì pho, Mósìsù nũru unu l'ũzo enyanwu-awawa enyimu Jiòdanu pho. Obenu le ndu alwũru unu ogu be e-vuru unwunna unu-a ũzo dafu azu iya ophuu; je eyeru unwunna unu eka; ¹⁵gbiriri jasũ teke Chipfu e-me g'ephe tũta unme; g'ò meru unubedua; bya emee; ephe anata alì ono, Chipfu, bú Chileke unu a-nũ phe g'ò buru nkephe ono. Teke e mecharu; unu alaphuwaro azu je eburu l'alì k'ono, onye-ozì Chipfu, bú Mósìsù nũru g'ò buru k'unu l'azu enyimu Jiòdanu azu iya ophuu; l'ũzo enyanwu-awawa.”

¹⁶Ephe sù Jioshuwa: “Iphemiphe, ì sũru g'anyi mee be anyi e-mekota-je. Eka ì sũru g'anyi je be anyi e-je. ¹⁷Oo egube ono, anyi ngabekotaru Mósìsù nchì l'iphemiphe ono bú g'anyi a-ngabejeru ngu iya. Oe oo ephe ge Chipfu, bú Chileke ngu no-kube ngu; g'ò shi no-kube Mósìsù. ¹⁸Onye jìkakporu l'o too medu opfu ngu; m'obeta o buru gunu be ì ziru iya be eegbuje egbugbu. Oe o bukwapho g'obu shihu ngu ike; ophu ndu agukwa ngu!”

Réhabu; yee ndu ngge

2 ¹Noo ya; Jioshuwa nwa Nunu bya agbe le Shitimu zia ndu ngge labo le mpya. Sù phe: “Unu je agbaphee alì ono; kelekelekpò ke mkpukpu Jieriko.” Tòbudu iya bú; ephe tugbua bya eje abahu l'ulo ibe nwanyì ovuoba, aza Réhabu je anodu.

²Ama bya agbaarũ eze ndu Jieriko sù l'o nwekwarũ ndu Ízurelu bataru le mkpukpu-a l'uzenyashi-a; bya anwũ ngge l'alì-a. ³Eze ndu Jieriko bya ezia ozi sù g'e je asũ Réhabu g'o je achifuta unwoke ono, bataru ibe iya ono; noo kele ephe byaru anwũ ngge l'alì-a l'ophu.

⁴Obenu l'e jeshiaru; nwanyì ono dutawa unwoke labo ono je ewoha. O sù phe: “Unwoke ono byakwaru-a; oe mu ta amakwa eka ephe shi bya. ⁵O be l'uzenyashi; g'ò rwuwaru mgboru teke aabya agũ-chi oguzo mkpukpu; ephe tugbua. Ophu mu amaekwa ibe iya ophu ephe shiru. O -buru l'unu tugburu nta-a gbakwaseru ũzo be unu a-gbapfukwa phe-a l'ũzo.”

⁶(Ama l'o dutaru phe je ewohaa le mkpula oghu ochaa, a sũsagbaaru l'eli ulo ono.) ⁷Unwoke ono gbakwaseru ũzo, eeshije je adaa enyimu Jiòdanu; jeshia achò ndu ngge ono. Ephe lufuepho azu mkpukpu; e woru oguzo mkpukpu ono gu-chia.

⁸Ndu ngge ono bya l'ala l'ulo; nwanyì ono byapfuta phe l'eli ulo ono; ⁹bya asũ phe: “Mu mawaru le Chipfu nũwaru unu alì-a. Akpabiri unu gudewaru anyi g'anyi hakota. Ndu bukota l'alì-a be anmakota rwuurwu l'eka ephe atsũ unu ebvu. ¹⁰Anyi nũmawaru ge Chipfu gude meeru unu

gbororo l'echi Eze-enyimu Uswe-uswe lẹ teke unu shi l'alị ndu Ijiputu wufuta; wafua g'unu woru eze ndu Amoru umadzu labo ono, bu Sihonu; waa Ogu mee umerekete l'uzo enyanwu-awawa enyimu Jiordanu. ¹¹Anyi numachaa nno; meji tofu anyi; ike bukwapfo anyi l'opfu ehu unu; noo kele anyi maru lẹ Chipfu, bu Chileke unu bu Chileke k'imigwe; waa k'eli-phe. ¹²Nta-a bukwa g'unu gude epha Chipfu riaru mu nte l'unu e-meru mu lẹ ndibe mu iphe-oma; eshinu mbedua mekwarupho unu iphe-oma. Unu anu mu iphe-ohubama iya; ¹³l'unu a-dzo nna mu ndzu; waa ne mu; waa unwune mu nwoke; waa unwune mu ke nwanyi; mekpoo ndibe anyi l'ophu; mbu l'unu a-dzota anyi g'anyi ta anwuhu."

¹⁴Ephe su iya: "Anyi e-gude kele i dzoru anyi ndzu; dzoo ndzu nkengu. O -buru l'o to nwedu onye i pfuru iphe, anyi byaru ememe-a; be Chipfu-nupho anyi ali ono be anyi e-doheru ngu ire-lanu meeru gu lẹ ndibe ngu iphe-oma."

¹⁵O bya epyofu eri lẹ windo; ephe gude iya eka lufu azu iya ophu; noo kele o bu l'ulo, a kpuru l'eli igbulu, e gude kpu-pee mkpukpu ono mgburugburu. ¹⁶O su phe: "Unu tugbukwaa je ewohaa onwunu l'ubvu ge ndu ono, acho unu ono ta ahuma unu. Unu wohaa onwunu l'eka ono ujiku eto ge ndu ono lwaphutaada azu; teme unu atugbuwaro jeshia iphe, unu eje."

¹⁷Unwoke ono su iya; "Nte-a, i meru anyi ria tee gudekwa anyi; ¹⁸gbahaa l'anyi byatashiaru; i lipfube eri-a, du uswe-uswe-a, i gude yeru anyi eka; anyi nyifu-a lẹ windo, anyi pyoru ono. Teme i duta nna ngu; yee ne ngu; waa unwune ngu; mekpoo ndibe ngu l'ophu dobe l'ulo ngu. ¹⁹Onye tugburu lufu gbororo; iphe me iya; be bukwa iya paa ishi ochi onwiya; o to bukwa anyibedua. Oo ndu ophu no l'ime ulo ngu gedegede be anyibedua paa ishi ochi phe mo duru onye denyiru phe eka. ²⁰Ole o -bukwanuru l'i tugburu je epfukashia iphe, anyi byaru ememe-a; be nte ono, i suru g'anyi riaru ngu ono tee gudekwa anyi."

²¹O su: "Ee! Mu kwetaru!" G'o du g'unu pfuru; o dufu phe; ephe tugbua. O wota eri uswe-uswe ono lipfube lẹ windo ono.

²²Ephe tugbua je ewohaa onwophe l'ubvu ujiku eto; gbiriri jasu ndu achi phe nu chokota phe l'uzo ono; ophu ephe ahumaduru phe; ephe la-phu azu. ²³Noo ya; unwoke labo ono bya afuta; o buru phe alala. Ephe bya akpo-zeta l'okpa ubvu ono; bya adaa enyimu lapfushia Jioshuwa nwa Nunu. Ephe je akokotaru iya iphe, nwukotaru phe nu. ²⁴Ephe su Jioshuwa: "Ali ono g'o ha be Chipfu woakwaru ye anyi l'eka. Gephe ha tukoeppo aphu ke kpaakpaakpaa l'eka ndzu anyi agu phe."

Ndu Izurelu awugha enyimu Jiordanu

3 ¹O be l'onmewa-utsu; Jioshuwa; yele ndu Izurelu g'ephe ha wufu lẹ Shitimu; jeshia enyimu Jiordanu. Ephe woru ulo-ekwa phe kpobe-gba l'eka ono g'ephe noduadada; teme ephe aghaa enyimu ono. ²A noepho

ujiku ẹto; ndu-ishi ndu ojogu bya ejedzukoṭaru ẹka ẹphe ɔru ono; ³bya asu ndu Ízurelu: “Unu -humaepho okpoko oḡbandzu ke Chipfu, bu Chileke unu; waa ndu-uke, bu phe bu oshilokpa Lívayi l'ẹka ẹphe pa iya; unu wu-lihukwa l'ẹka unu no tsoru iya. ⁴Oo ya bu g'unu amaru ọzo, unu e-shi; eshi ophu unu teke eshiswee ọzo owa-a. Ole g'unu te etsokubekwa iya ntse ntse. Unu a-kparu unu nkwo-ẹka ise yeru okpoko ono.”

⁵Noo ya; Jioshuwa su ndu ono: “Unu doo onwunu nsu; noo kele echele be Chipfu e-me iphe, du biribiri l'echilabo unu!”

⁶Jioshuwa su ndu-uke: “Ngwa; unu pata okpoko oḡbandzu ono ghata ndu Ízurelu vuru ọzo!” Epe bya apata iya ghata vuru ọzo.

⁷Chipfu su Jioshuwa: “Ntanu-a be mu e-kutse ngu l'atatiphu ndu Ízurelu g'ẹphe ha; k'ophu ẹphe a-maru le mu no-kube ngu egube ono, mu shi no-kube Mosisu ono. ⁸Pfuaru ndu-uke, pa okpoko oḡbandzu su phe: ‘Teke unu rwuru enyimu Jiḡdanu; unu rwuba l'ime enyimu ono je apfuru!’ ”

⁹Jioshuwa su ndu Ízurelu: “Unu dzua l'ẹka-a bya angabe nchi l'opfu Chipfu, bu Chileke unu. ¹⁰Waa g'unu e-shi maru le Chileke ophu dzu ndzu bu l'echilabo unu baa; teme l'oo-chifuru unu ndu Kėnanu; waa ndu Hetu; waa ndu Hevu; waa ndu Pėrezu; waa ndu Gigashi; waa ndu Amoru; waa ndu Jiebusu. ¹¹Unu huma l'okpoko oḡbandzu ke Chipfu ophu nwe mgboko l'ophu be e-vuru unu ọzo rwuba l'enyimu Jiḡdanu. ¹²Nta-a bu-kwa g'unu ho unwoke nanu nanu l'okpa-ipfu l'okpa-ipfu; hota umadzu iri l'ẹbo dobe. ¹³Ndu uke, pa okpoko oḡbandzu Chipfu; Chipfu ophu nwe mgboko l'ophu; -yeepho okpa le Jiḡdanu; be mini ono, aso ala l'uzo ndo-hali ono e-bukahụ ẹbo kpa oronmono.”

¹⁴Oo ya bu; ẹphe bya aphokashia ulo-ekwa phe g'ẹphe daa enyimu Jiḡdanu; ndu-uke bya apata okpoko oḡbandzu ghata vuru ọzo. ¹⁵Teke ono be enyimu Jiḡdanu byakporu utso shingushingu; kele o bu teke eemeta iphe, e meberu l'ali. Ole ndu-uke Chileke, pa okpoko ono rwubaerupho l'enyimu Jiḡdanu; mbu l'oo epho erwurwu, okpa phe erwu le mini ono; ¹⁶mini, shi l'ishi nggele so-buhu asoso. Mini ono bya akocha obvudu ọzenya ọzenya le mkpukpu Adamu, no le mgboru Zaretanu; mini ono, aso ala le Eze-enyimu nsuda Araba, bu iya bu Eze-enyimu Unu tabuha ẹbo. Oo ya bu; ndu Ízurelu bya awughaa dafu azu iya ophu gha iphu le mkpukpu Jieriko. ¹⁷Ndu uke, pa okpoko oḡbandzu Chipfu ono; paru iya pfuru pfushia ike l'echilabo enyimu Jiḡdanu, buwaa ali okponku ono; ndu Ízurelu nodu awughu. Epe pfuru gbiriri jasu oha ono l'ophu jekota ije ghata l'echilabo enyimu Jiḡdanu ono, buwaa ali okponku ono.

Mkpuma, e gude anyata iphe, Chipfu meru

4 ¹Ndu Ízurelu ghatagbuchaepho enyimu Jiḡdanu; Chipfu bya epfuru yeru Jioshuwa su iya: ²“Ho unwoke nanu nanu l'okpa-ipfu l'okpa-ipfu; hota umadzu iri l'ẹbo l'echilabo ndu Ízurelu; ³zia phe g'ẹphe pata

mkpuma iri l'èbo l'echilabọ ẹnnyimu Jiódanu l'èka ndu-uke Chileke p̄furu. G'èphe pata mkpuma ono pafuta l'ẹnnyimu ono; parụ jeshia èka unu a-kwa. Èphe -rwua; èphe atùko zia mkpuma ono l'èka ono.”

⁴Ọo ya bụ: Jioshuwa bya ekukọbe unwoke iri l'èbo ono, ọ ọrụ nanụ nanụ l'ọkpa-ipfu l'ọkpa-ipfu ndu Ízurelu ono; ⁵bya asụ p̄he: “Unu tugbua je l'èka ono, a pa okpoko ọgbandzu Chipfu, bụ Chileke unu p̄furu l'echilabọ Jiódanu ono. Unu je apatachaa mkpuma lanụ mkpuma lanụ nmakobechaa l'ukuvu; gbiriri jasụ unu apatadzua ya ọkpa-ipfu iri l'èbo, ndu Ízurelu dụ. ⁶Ono a-buru iphe-ohubama, unu doberu l'echilabọ unu; k'ophu bụ teke unwu unu, eje l'iphu jiru nna p̄he sụ: ‘?Bụ ḡunụ bẹ unu dobedoru mkpuma ọwa-a?’ ⁷Unu asụ p̄he lẹ teke e gude okpoko ọgbandzu Chipfu rwubata l'ẹnnyimu Jiódanu bẹ ẹnnyimu ono tabuharu èbo. Mbụ l'okpoko ono daerupho ẹnnyimu Jiódanu; mini ono tabuha èbo. Mkpuma ono bụ iphe, ndu Ízurelu e-gudeje nyata iphe ono, nwuru nụ ono jasụ lẹ tuutuutu lẹ m̄imiimii.”

⁸Ọo ya bụ; ndu Ízurelu bya emee gẹ Jioshuwa ziru p̄he; je apata mkpuma iri l'èbo l'echilabọ ẹnnyimu Jiódanu, bụ iya bụ g'ọkpa-ipfu Ízurelu ha; bya aburu gẹ Chipfu p̄furu iya Jioshuwa. Èphe parụ mkpuma ono ghaa ẹnnyimu Jiódanu; je edobe l'èka èphe kwarụ. ⁹Jioshuwa bya apakọbe mkpuma iri l'èbo l'echilabọ ẹnnyimu Jiódanu l'enyoru phọ, ndu-uke Chileke, shi parụ okpoko ọgbandzu Chileke p̄furu phọ. Ọ ñekwapho l'èka ono byasụ ntanụ-a.

¹⁰Ndu uke, pa okpoko ono p̄fukpoerupho l'echilabọ ẹnnyimu Jiódanu ono gbiriri jasụ ndu Ízurelu mekọta iphe, Chipfu s̄uru Jioshuwa g'e mee. E mee bekota iya gẹ Mósisi t̄uru Jioshuwa ọnu s̄u g'e mee ya. Nokwaphọ gẹ ndu Ízurelu wuru ẹgwegwa wughaa. ¹¹Èphe wughataepho je akuru l'azụ iya ophuu; ele ẹnya; ndu-uke parụ okpoko ọgbandzu Chipfu lufuta nkephe. ¹²Ndu ọkpa-ipfu Rúbenu; waa kẹ Gadu; waa ndu ọkpa-ipfu Manáse, ekeru èbo; bya akwaa onwophẹ ngwọgu gẹ Mósisi s̄uru g'èphe mee; wufuta bya awughaa l'atatiphu unwu Ízurelu. ¹³Ndu kwarụ onwophẹ ngwọgu wughata l'atatiphu Chipfu, bụ ndu kwakoberu k'ogu; wuru jeshia lẹ baswaa alị, ñọ lẹ mgboru mkpukpu Jieriko; dụ ukporo unu unwoke ise.

¹⁴Mbọku ono bẹ Chipfu tuliru Jioshuwa èka l'eli l'atatiphu ndu Ízurelu. Èphe wata akwabẹ Jioshuwa ùbvù. Ọ b̄erupho g'e shi akwabẹ Mósisi ùbvù bụ g'a kwabẹru iya ya jasụ ọ nwuhu.

¹⁵Noo ya; Chipfu bya epfuru nụ Jioshuwa s̄u iya; ¹⁶“Ngwa; kawaruro ndu-uke, pa okpoko-ekemu ono g'èphe lufutawaro l'ẹnnyimu Jiódanu l'èka ono, èphe p̄furu ono.” ¹⁷Tòbudu iya bụ; Jioshuwa bya akaru ndu-uke ono s̄u p̄he: “Ngwa; unu shiwaro l'ẹnnyimu Jiódanu ono futa!”

¹⁸Tòbudu iya bụ; ndu-uke Chileke parụ okpoko ono lufuta. Ọ b̄erupho azọbe ọkpa p̄he l'eli mgboko; mini ẹnnyimu Jiódanu ono s̄ogbabe; bya abyaa utso; bya adu g'o shihawaa dụ.

¹⁹O -rwua lẹ mbọku, ọnwá mbụ dú l'abalì iri; ephe gbẹ l'enyimu Jíódanu jeshia mkpụkpu Gilugalu lẹ mgboru oke alì mkpụkpu Jieriko l'uzo ẹnyanwu-awawa. ²⁰Jioshuwa woru mkpuma iri l'ẹbo, a pataru l'enyimu Jíódanu ono; woru kpọkobe lẹ Gilugalu. ²¹Ọ sụ ndu Ízurelụ: “O -rwuepho l'atatiphu; teke unwu unu a-ji unu sụ: ‘?Bụ gụnu bẹ e dobedoru mkpuma ọwa-a?’ ²²Unu asụ phẹ l'unwu Ízurelụ gharu ẹnnyimu Jíódanu l'alì ọkponku. ²³Kele Chipfu, bụ Chileke unu meru ọma ẹnnyimu ọ kpọhu nkụ l'iphu unu gbiriri jasụ unu wughakota. Ọo ẹpho iphe ono, Chipfu, bụ Chileke unu meru lẹ Eze-ẹnnyimu Uswe-uswe ono bẹ o meru l'enyimu Jíódanu ono. Mbụ teke ono, o meru Eze-ẹnnyimu Uswe-uswe ọ tabuha; ọma alì iya kpọhu jegiri-jegiri nọo jasụ anyi tuko wughakota ono. ²⁴Iphe, kparụ iphe, o meru iya bụ g'unwu-eliphe amaru lẹ Chipfu nweru ọkpehu; ọo ya bụ g'unu atsujẹ Chipfu, bụ Chileke unu ebvu.”

5 ¹Tọbudu iya bụ; eze ndu Amọru, bu l'uzo ẹnyanwu-arịba ẹnnyimu Jíódanu; waa eze kẹ ndu Kénanu, bu lẹ mgboru eze-ẹnnyimu; nūmaepho lẹ Chipfu meru ọma ẹnnyimu Jíódanu kpọhu nkụ; unwu Ízurelụ bya awughá g'ẹphe hákọta; ndzụ rwuta phẹ. Akpabiri unwu Ízurelụ ono mee; ọphu ụvohu adụkpọedu phẹ ililekpọo.

Ndu Ízurelụ ebushi úbvù lẹ Gilugalu

²Ọ buru teke ono bẹ Chipfu sụru Jioshuwa: “Gude mma, atsụ nkọ bushia unwu Ízurelụ úbvù! Ono bụ k'ugbo ẹbo, e buru ụdu úbvù ono lẹ Ízurelụ.” ³Ọo ya bụ; Jioshuwa bya egude mkpuma mee mma gude bushia unwu Ízurelụ úbvù lẹ Úbvù Akpapyị ono.

⁴Waa iphe, meru g'o gude Jioshuwa bushia phẹ úbvù baa: Unwoke, shi l'alì Ijiputu futa; mbụ ndu sụru eje ọgu bẹ nwụshihukotarunu l'echiegu, g'ẹphe shichaepho l'alì Ijiputu lufuta. ⁵Iphe, bukota ndu ono g'ẹphe ha bẹ bushikọtaru úbvù. Obenu l'unwegirima, a nwuru l'echiegu teke ẹphe shiwaa l'alì Ijiputu lufuta bẹ e te buduru úbvù. ⁶Kele unwu Ízurelụ nọru ụkporo apha labọ l'echiegu. Unwu Ízurelụ, bụ ndu sụru eje ọgu; mbụ ndu ono, shi lẹ Ijiputu futa ono nọdu l'ẹka ono nwụshihu-gbua; kele ẹphe te ekwedu mee iphe, Chipfu sụru g'ẹphe mee. Ọo ya bụ; Chipfu ria nte sụ l'ẹphe ta abyadu ahuma alì ono, ya kweru nna phẹ oche ukwe lẹ ya a-nụ phẹ; mbụ alì, manụ-ẹnwu yẹle ẹra-eswi asọ gborogboro. ⁷Noo ya; o mee unwu phẹ bya evutachaa nọchia ẹnna nna phẹ. Ọ buru ndu ono bẹ Jioshuwa bushiru úbvù-a; kele ẹphe shi buru akpapyị; l'e te buduru phẹ úbvù teke ẹphe eje l'echiegu. ⁸E bushichaa ẹphebe ọha ophu ono úbvù g'ẹphe ha; ẹphe nọdu l'ulo-ẹkwa phẹ nyaa ya gbiriri jasụ ẹphe ka mma.

⁹No iya; Chipfu sụ Jioshuwa: “Ntanụ-a bẹ mu swafuwaru unu iphere ono, shi unu lẹ teke unu gbeshiru l'alì Ijiputu ono!” Ọo ya bụ; e woru ẹka ono gụa Gilugalu, bụ iya bụ “eswifu.”

¹⁰Ọ buru teke ndu Ízurelụ nọ lẹ Gilugalu bẹ ephe boru ọbo Ojehata; l'uzenyashi mbọku, ọnwá ono dūepho abalì iri l'eno; lẹ baswaa alì, nọ lẹ

mgboru mkpukpu Jieriko. ¹¹O be le nchitabohu mboku obo Ojaghata; ephe ria iphe, shi l'alì ono. Ephe taru buredi, ekoduru ekoko; bya ataa akpe, a huru ahuhu. ¹²A -gbe le mboku, ephe beberu wata eri iphe, shi l'alì ono be mana dabuhuru. Ophu mana adabaeduru ndu Ízurelu; ephe gbe l'apha ono rikwaseru nri, a kotaru l'alì ndu Kénanu.

Jioshuwa yee onye pa ogu-echi

¹³Jioshuwa nduepho le mgboru mkpukpu Jieriko l'eka ono; o palia enya huma nwoke, mitawaru ogu-echi iya paru l'eka pfuru iya l'atatiphu. Jioshuwa bya ejepfu iya su: “?I bu anyi? To o ?I bu ke ndu ohogu anyi?”

¹⁴O su iya: “Waawakwa; mu bukwa onye-ishi ndu ojogu ke Chipfu. O buru iphe ono be mu byaru.”

Jioshuwa bya adaa kpurumu; woru iphu kpube l'alì baaru iya eja bya asu iya: “?Bu gunu be Nnajiuphu ziru mube onye-ozì iya?”

¹⁵Onye-ishi ndu ojogu Chipfu ono su Jioshuwa: “Yefu akpokpa ngu; ke le eka ono, i pfuru ono bukwa eka du nso!” Jioshuwa kwe doo bya emee g'o pfuru.

Adada Jieriko

6 ¹To budu iya bu; ndu mkpukpu Jieriko woerupho onuzo eka eeshije abahu l'ime mkpukpu phe tu-chia. Ophu o duedu onye abata abata; ophu o duedu onye alufu alufu; l'eka ephe atsù ndu Ízurelu ebvu.

²No iya; Chipfu su Jioshuwa: “Humakwa; mu woakwaru mkpukpu Jieriko yee onye eze phe; yee ndu ojogu phe; ye ngu l'eka. ³Chita ndu ojogu ngu g'unu je azo-pee mkpukpu ono mgburugburu ugbo lanu le mboku. Unu emee ya nno abali ishii. ⁴Ndu uke Chileke umadzu esaa apagbaaru opu mpu ebili l'ehu l'ehu; vuru uzo; aaparu okpoko ogbandzu etso phe. O -be le mboku k'esaa; unu ejephee mkpukpu ono mgburugburu ugbo esaa. Ndu uke atuko wata egbu opu ono. ⁵Teke ephe gbuerupho opu ono mkpeelanu; ndu Ízurelu numa opu ono; ge ndu Ízurelu l'ophu wata agbo ogboo ehuka ehuka. Noo teke igbulu mkpukpu ono e-zekposhihu; onyemone echebeepho iphu nhamunha.”

⁶Noo ya; Jioshuwa nwa Nunu bya ekua ndu-uke Chileke bya asu phe: “Unu je apata okpoko ogbandzu Chipfu paru. Ge ndu-uke Chileke umadzu esaa gudegbaa opu mpu ebili l'ehu l'ehu; vuru uzo; unu aparau okpoko-ogbandzu Chipfu ono etso phe.” ⁷O bya edzukobe ndu Ízurelu su phe: “Unu wu-lihu jephee mkpukpu ono mgburugburu. Ge ndu gude ngwoğu vuru uzo; ge ndu pa okpoko ogbandzu Chipfu nodu etso phe!”

⁸Jioshuwa ziebechaa phe iya egube ono; ndu-uke esaa, pa opu mpu ebili l'ehu l'ehu; bya evuta uzo; egbu opu ono l'atatiphu Chipfu. Okpoko ogbandzu Chipfu nodu etso phe. ⁹Ndu kwaru ngwoğu bya awughata ndu-uke, egbu opu ono awughata je evuta uzo. Ndu ojogu ozo nodu etso

okpoko ogbandzu. Ndu uke Chileke ono nõdu egbuepho opu ono eje l'iphu l'iphu. ¹⁰Jioshuwa pfuhawaru phe su phe g'ò tò dukwa onye a-gbò ogboo; ophu e chikwa mkpu; gbiriri jasù mbòku, ya a-sù g'èphe gbòwaro ogboo; tème ephe agbòwaro ogboo. ¹¹Oo ya bù; ephe byanu apata okpoko ogbandzu Chipfu ono bya egude iya wu-pee mkpukpu ono. Ephe wu-pee mkpukpu ono mgbo lanu; bya awu-phu azu l'eka ephe doru je azeshia.

¹²O -rwua l'onmewa-utsu echele iya; Jioshuwa gbeshi; ndu-uke gbeshi; pata okpoko ogbandzu Chipfu. ¹³Ndu uke esaa, gudegbaa opu mpu ebili l'ehu l'ehu nõdu egbu opu ono eje l'ataphu okpoko ogbandzu Chipfu ono. Ndu chi ngwogu vuru uzo; ndu ojogu ozo nõdu awu etso phe l'azu. ¹⁴Lè mbòku k'èbo ono; bè ephe wufutaru; bya awu-pee mkpukpu ono mgburugburu mgbo lanu; bya awu-phu azu l'eka ephe doru. Ephe wu-pee nno abali ishii.

¹⁵O be lè mbòku k'esaa; ephe gbeshi l'onmewa-utsu; je awu-pee mkpukpu ono mgburugburu g'ephe awu-phejehawa iya. O lè mbòku ono bè ephe wu-pheru iya ugbo esaa. ¹⁶Ephe nõduepho lè k'ugbo esaa ono; ndu-uke woru opu phe gbu; Jioshuwa su unwu Ízurelu: "Unu tua okoo; kele Chipfu wowaru mkpukpu-a yee unu l'eka! ¹⁷Lè mkpukpu ono; mè iphemiphe, nõ iya nu; bè a nmaru mkpurophu dobe g'e mebyiaru Chileke g'ò buru iya iphe ngweja. Oo ephe nwanýi ovuoba ono, bù Réhabu bè aa-ha; yee onyemonye, nõkpoo l'ulo iya; noo kele o woharu ndu ngge, anyi zijeru pho. ¹⁸O lè unu kwabekwa enya g'ò tò dukwa iphemiphe ono, e doberu k'emebyishi ono, unu e-wota k'enworu; odumeka bè unu e-mekwa onwunu g'unu buru ndu e doberu k'emebyishi; kele unu wotaru iphe, e doberu k'emebyishi; unu emee; ndu Ízurelu l'ophu aburu iphe, e doberu k'emebyishi; shi nno kpataru phe opfu. ¹⁹Obenu l'iphe, bù mkpola-ochaa; waa mkpola-ododo; waa iphe, e meru l'onwirubvu; ozoo l'igwè; duchaaru Chipfu nsò. Ndu k'ono bè ee-gweta dobe l'ulo-eku kè Chipfu."

²⁰Ndu Ízurelu bya agbò ogbo. Mbù l'opu ono wataerupho adada; ephe tuko g'ephe ha wata agbò ogboo; igbulò, e gude kpu-pee mkpukpu ono mgburugburu zekposhihu buru l'alì gwoo. Unwu Ízurelu wuba l'ime mkpukpu ono; onyemonye chebeepho iphu nhamunha; ephe lwua mkpukpu ono lwuta. ²¹Tòbudu iya bù; ephe tuko iphemiphe, dù lè mkpukpu ono mebyishikota; unwanýi mè unwoke; nwata mè ogerenya; mè eswi; waa aturu; waa nkafu-igara. Iphemiphe ono bè ephe gude ogu-echi sua pyaapya.

²²No iya; Jioshuwa bya asu unwoke labo pho, nwuru ngge pho: "Unu bahu je l'ulo nwanýi ovuoba ono je edufuta iya; yee ndibe iya g'ephe ha. Unu je emeeru iya iphe ono, unu riru angu l'unu e-meru iya ono." ²³Oo ya bù; unwoke labo ono, jeru anwua ngge ono bya abahu l'ulo Réhabu je edufuta iya; dufuta nna iya yee ne iya; mè unwune iya; mekpoo iphe, bù ndu ephe l'iya nõ; mekpoo abubu iya l'ophu; chita phe je edobe l'azu eka ndu Ízurelu doru.

²⁴ Ɛphe tufu oku le mkpukpu ono; o tuko iphe, nokota iya nu tsufu. O be le mkpola-ochaa; waa mkpola-ododo; waa iphe, e meru l'oniyirubvu; ozoo l'igwe; ephe vuta ndu k'ono je edobe l'ulo-eku ke Chipfu. ²⁵ Olenwanyi ovuoba ono, bu Rehabu; yee ndibe iya; waa abubu iya l'ophu be Jioshuwa doberu ndzu; noo kele o woharu ndu Jioshuwa yeru g'ephe je anwua ngge le Jeriko. A haa; o buru l'echilabo ndu Izurelu gbiriri jasu ntau-a.

²⁶ Tobudu iya bu; Jioshuwa bya epfua ya pfushia ya ike su l'iphe, bukpoo onye nonyaru bya ejeshia akpukwa mkpukpu Jeriko-a buakwaa onye a turu onu l'iphu Chipfu. Su:

“G'onye ono bukwaru okpara iya
be oo-gude tua okpa igbulu ono.
Teme iphe, onye ono e-gude chia ya mgbo
aburu mbuhu ime iya.”

²⁷ Oo ya bu; Chipfu swikpoperupho Jioshuwa; teme udu Jioshuwa ono tuko ali aka ono vo pfurupfuru.

Iphe-aji Ekanu

7 ¹ Obenu l'iphe ono, Chipfu suru g'e mebyishiaru iya ono; be unwu Izurelu emebeduru ge Chipfu suru g'e mee ya. Ekanu nwa Kami, bu nwanwa Zabudi; bya aburu nwanwanwanwanwa Zera; buru onye shi l'okpa-ipfu Jiuda; be haru iphe ono, a suru g'e mebyishia ono gweta k'enworu. Chipfu vaharu ndu Izurelu ovuma.

² Noo ya; Jioshuwa gbale le mkpukpu Jeriko zia unwoke g'ephe je mkpukpu Eyayi, no-kube mkpukpu Betu-Avenu; l'uzo enyanwu-awawa mkpukpu Betelu; su phe g'ephe je anwua ngge l'onu-egu ibe iya ono. Oo ya bu; unwoke ono je anwua mkpukpu Eyayi ngge.

³ Ephe lwa bya asu Jioshuwa-a: “Ge ndu Izurelu l'ophu ta awukwaru je k'ogiya-a. O kwa unu unwoke ise; ozoo unu esaa l'umadzu ukporo iri be ee-ye g'ephe je alwuta ndu Eyayi obu. G'a ta chitakwa ndu Izurelu l'ophu g'ephe je ese nsegbu akanya; kele ndu ono bu-a nwochileka mkpukpu.”

⁴ Oo ya bu; a byanu ezia unu umadzu esaa l'umadzu ukporo iri; ephe jeshia alwu Eyayi. Ephe jerwua; ndu Eyayi chia phe ikpabaka. ⁵ Ephe gbua ndu Izurelu iphe, rwuru umadzu ukporo l'iri l'ishii. Ephe shiepho l'eka eeshije abahu le mkpukpu Eyayi chia ndu Izurelu oso jasu l'eka aakwoje mkpuma; bya egbushia ndu du igwerigwe g'ephe agbazeta le nsuda ono; k'ophu bu le meji tofuru ndu Izurelu; ephe rwushihu.

⁶ Tobudu iya bu; Jioshuwa yeephe aka l'uwe iya laa tarara; bya adaa kpurumu; woru iphu bube l'ali l'atatiphu okpoko Chipfu gbiriri jasu nchi jihu. O buru ephe le ndu bu ogerenya ndu Izurelu tukoru wushiru l'eka ono; votachaa urwuku kpube onwophe l'ishi. ⁷ Jioshuwa bya asu: “Gube Nnajiuphu, bu Chipfu; ?Bu iphe, i dughataru anyi enyimu Jiordanu bu gi

bya eworu anyi ye ndu Amoru l'eka g'ephe gbushia? Anyi gege anodu-kwaro lazū enyimu Jiōdanu azū iya ophuu! ⁸Gūbe Nnajiuphu; ?bū gūnu bē mu e-pfujekpoo nta-a; gē ndu ohogu ndu Ízurelu achi anyi kpabekpabe egube-a? ⁹Noo kele o -buru lē ndu Kēnanu; waa ndu ozo, bukōta l'alī-a nūmaru iya bē ephe a-byakwa atūko anyi lwuebe; mbū mee; anyi achi-hu lē mgboko-a. O -bukwanuru l'ō dū nno; ?bū gūnu bē ii-me g'epha ngu ono, parū ēka ono pfuru?"

¹⁰Oo ya bū; Chipfu sū Jioshuwa: "Gbēshi agbēshi! ?Bū gūnu kparū iphe, ī zē woru iphu kpube l'alī? ¹¹O kwa ndu Ízurelu meru iphe-ēji. Ephe wowaru oḡbandzu ono, mu sūru g'ephe dobe ono gbukaa. Kele ephe harū iphe ono, mu sūru g'e mebyishia ono woru je achikobe l'iphe, ephe nweru. Ephe ziakwaru iphuru; bya adzūa ūka. ¹²Noo iphe, kparū iphe, ndu Ízurelu adūdu ike pfushia ike l'iphu ndu ohogu phē. Ephe dakōbe ye okpa l'oso; kele ephe bū ndu e doberu k'emebyishi. Unu -atukoduru iphemiphe ono, mu sūru g'e mebyishia ono chifuta mebyishikōta bē mu ta anō-kubebaekwa unu ozobaa.

¹³"Gbalihu je emee ndu Ízurelu g'ephe dū nsō. Iphe, ii-pfuru phē bū: Unu dobe onwunu nsō kwabēru echele. Lē-a; wakwa iphe, Chipfu, bū Chileke kē ndu Ízurelu epfu baa: O nwekwarū iphe, e doberu k'emebyishi, dū l'echilabō unubē ndu Ízurelu. Ophu unu adukwa ike apfushibaa ike l'iphu ndu ohogu unu; abūdu l'unu wofuru iphe ono, e doberu k'emebyishi ono l'echilabō unu.

¹⁴"O -rwua l'utsu bē aa-chīru unu bya l'ēka-a l'ipfu l'ipfu. Ipfu ophu Chipfu tūru ēka afūta bya l'ēnya-unuphu l'ēnya-unuphu. Enya-unuphu ophu Chipfu tūru ēka abyaa l'onulo l'onulo. Onu-ulo ophu Chipfu tūru ēka abyaa l'onye l'onye. ¹⁵Iphe, bukpoō onye a hūmaru iphe ono, e doberu k'emebyishi ono l'ēka; unu kpoo ya oku; yēe ndibe iya; mekpoo iphemiphe, o nweru enweru g'ō ha. Onye obu gbukarū oḡbandzu Chipfu; bya emewaa akpamara l'alī ndu Ízurelu."

¹⁶O -rwua l'onmewa-utsu; Jioshuwa bya ekua ndu Ízurelu g'ephe wūfuta bya anō l'ipfu l'ipfu. A hōta ipfu Jiuda. ¹⁷Okpa-ipfu Jiuda bya anō l'onulo l'onulo; o nmaa onu-ulo Zera. A bya edoo ndu onu-ulo Zera l'ēnya-unuphu l'ēnya-unuphu; o nmaa enya-unuphu Zabudi. ¹⁸O bya achifuta enya-unuphu Zabudi bya edoo phē l'onye l'onye; o nmaa Ekanu nwa Kami; mbū nwanwa Zabudi; bya abūru nwanwanwanwanwa Zera; būru onye shi l'okpa-ipfu Jiuda.

¹⁹Noo ya; Jioshuwa bya asū Ekanu: "Nwa mu; jiko kwabekwa Chipfu, bū Chileke ndu Ízurelu ūbvū. Pfuaru mu iphe, ī meru; mbū-a; pfukpoeru mu phō iphe, ī meru. Pfuaru mu iya nta-a; b'emekwarū mu iya lē mpya!"

²⁰Ekanu bya eyeeru Jioshuwa onu sū iya: "O kwa eviya; mu mesweakwaru Chipfu, bū Chileke kē ndu Ízurelu. Wakwa iphe, mu meru baa.

²¹Mu hūmaru uwe mgbalanū, ama mma; uwe ndu Bābilōnu, yī l'iphe ono,

aakwa l'okwata ono; bya ahuma mkpola-ochaa, erwa iya du ukporo shekelu iri; waa mkpirikpu mkpola-ododo, erwa iya du ukporo shekelu labo le shekelu iri. O guahaa mu egu enworu; mu jenu achita iya nworu. Mu bya eje ebvua nsu l'ime ulo-ekwa mu woru iya libe; mu woru mkpola-ochaa pho dobe l'ohu nsu ono.”

²²Oo ya bu; Jioshuwa bya eye nemadzu; a gbaru jeshia ibe Ekanu. E jeshia; o domiwaa ya l'ulo ibe iya eviya; mkpola-ochaa pho noduepho l'ohu nsu l'eka o domiru iya. ²³Ephe bya avota iphe ono l'ulo ibe iya l'eka ono gbaru bya achie Jioshuwa yee unwu Izurelu g'ephe ha. E woru iya tosa l'alj l'atatiphu Chipfu l'eka ono.

²⁴Noo ya; Jioshuwa yee ndu Izurelu g'ephe ha bya akputa Ekanu, bu onye onu-ulo Zera; waa unwu iya nwoke; me ke nwanyi; bya achita mkpola-ochaa ono; yee uwe mgbalanu ono; waa mkpirikpu mkpola-ododo ono; waa ulo-ekwa iya; bya akputa eswi iya; waa nkafu-igara iya; waa aturu iya; mekpoo iphe, o nweru enweru go ha gude je adoru le nsuda Akoru. ²⁵No iya; Jioshuwa su iya: “?Denu go gude i kpataru anyi opfu? Ntanu be Chipfu e-mekwanu g'opfu rikpute ngu ishi.”

Noo ya; ndu Izurelu wupyaabe yee ndibe iya woru phe tugbushia le mkpuma; bya eworu phe kpoo oku. ²⁶Ephe tutua mkpuma, du igwerigwe kube Ekanu l'eli. Mkpuma ono no l'eka ono gbiriri jasu ntanu-a. O buru iya bu le Chipfu avu-buhuru ndu Izurelu ovuma. Oo ya bu; a wata eku eka ono nsuda Akoru, bu iya bu “iphe-ehuka”. E kumaru eka ono epha ono byasu ntanu-a.

Aalwu-kpe ndu Eyayi

8 ¹Tobudu iya bu; Chipfu su Jioshuwa: “Ge ndzu ba agushi ngu; ophu meji atofukwa ngu. Rwuta ndu ojogu g'ephe ha gude jepfu ndu Eyayi ogu. Kele-a; mu woakwaru onye eze ndu Eyayi; yee ndibe iya; mekpoo mkpukpu iya; waa ali iya woru ye ngu l'eka. ²Oo epho iphe, unu meru ndu Jieriko; waa onye eze phe; be unu e-me ndu Eyayi; yee onye eze phe. Ole iphe phe, a lwutaru l'ogu; waa iphe-edobe phe be unu te emebyishidu emebyishi. Unu a-tuko iya gweta go buru nkunu. Unu je edomia onwunu lazū mkpukpu ono.”

³Oo ya bu; Jioshuwa yee ndu ojogu ndu Izurelu l'ophu tsulihu jeshia ogu le Eyayi. Jioshuwa bya ahota ndu ojogu, ike du l'ogu; unu ukporo eto l'iri l'ise; dufu phe l'enyashi. ⁴Iphe, o pfuru phe bu: “Unu lekwa; unu je edomia onwunu lazū mkpukpu ono kwaberu phe. Unu ta anodukwa mkpukpu ono enya; oo epho g'unu kwakobe akwakobe. ⁵Mbedua le ndu mu l'ephe swi e-je emeeru ndu mkpukpu ono bugagangu. Teke epho wu-futuru byatashia anyi etso ogu; g'ephe tsoru iya anyi ogiya ophu; anyi eye okpa l'oso gbalaaha. ⁶Ephe achia anyi gbiriri jasū anyi edefutagbua phe; k'ophu epho nowa mkpukpu ono uzanya; noo kele epho a-su l'anyi

a-gbakwaru phe oso g'anyi gbaru le mbu pho. Oo ya bu; teke anyi yee-rupho okpa l'oso gbalashiaru phe; 7unu eshi l'eka unu woharu onwunu wubata le mkpukpu ono; kele Chipfu, bu Chileke unu wowaru iya yee unu l'eka. 8Unu -wubaepho le mkpukpu ono; unu tufu iya oku. Unu mekwaa ya ge Chipfu suru g'e mee ya. Unu tukokwa iphemiphe-a, mu suru g'unu mee-a; mekota!"

9Tobudu iya bu; Jioshuwa su g'ephe je; ephe tugbua je ewohaa onwophe le mgbaka Betelu yee Eyayi; l'uzo enyanwu-awawa Eyayi. Jioshuwa yee ndu Izurelu nodu l'unuphu lenyashi ono.

10O -rwua l'onmewa-utsu; Jioshuwa dzua ndu nkiya. Ephe le ndu bu ogerenya ndu Izurelu vuta uzo duru phe jeshia mkpukpu Eyayi. 11Ndu ojogu, ephe l'iya swi g'ephe ha wu-tsoru iya; jasu ephe jerwua ataphu mkpukpu ono. Ephe kpohe ulo-ekwa phe l'uzo isheli mkpukpu Eyayi. Nsuda nokaha ephe le mkpukpu Eyayi l'echilabo. 12Jioshuwa bya eduta unwoke, rwuru unu iri l'ebo l'ukporo iri je edomia le mgbaka mkpukpu Betelu yee mkpukpu Eyayi; l'uzo enyanwu-ariba mkpukpu ono. 13O bya edoo ndu ojogu ono g'ephe a-nodu k'ogu. O woru ndu bukpo ndu alwu ugu gedegede dobe l'uzo isheli mkpukpu ono; bya achiru ndu ophu phoduru nu dobe l'uzo enyanwu-ariba. Jioshuwa lonwiya nodu le nsuda ono.

14Eze ndu Eyayi humaeppo iphe ono; yele ndu mkpukpu iya ono gude oso wufuta le mkpukpu ono l'onmewa-utsu; chebe iphu l'uzo nsuda Araba jepfushia ndu Izurelu ugu. Ophu o to madu l'o nweru ndu woharu onwophe l'azu mkpukpu ono kwaberu phe. 15Jioshuwa yee ndu Izurelu g'ephe ha meahaa g'o bu leemekpe phe emekpe. Ephe chipyabe phe; chia phe gbaa uzo echiegu. 16E kukota unwoke, bu le mkpukpu Eyayi l'ophu; ephe zefuta toko chipyabe phe. Ephe gude achi Jioshuwa phe oso gbiriri jasu ndu Eyayi ono wufu-gbua l'oma mkpukpu phe. 17Ophu o to dudu g'o ka mma l'oo nwoke lanu, bu le mkpukpu Eyayi; ozo mkpukpu Betelu, alufuduru chiru ndu Izurelu kwaseru. Ephe gbadokota mkpukpu phe; ghebe iya onu; chiru ndu Izurelu tugbua.

18Noo ya; Chipfu su Jioshuwa: "Ngwa; wolia arwa ngu maa amama l'uzo mkpukpu Eyayi; ge mu bya bya eworu mkpukpu ono ye ngu l'eka!" Tobudu iya bu; Jioshuwa bya ewolia arwa iya bya eworu maa l'uzo mkpukpu Eyayi. 19Ewoli, Jioshuwa ewoli arwa ono; ndu pho, woharu onwophe k'ogu pho shi l'eka ephe no wufutagbaa wuba le mkpukpu ono je alwua ya lwuta teke ono teke ono woru oku tufu iya.

20Unwoke Eyayi jeshia agha enya l'azu; enwuru-oku shiwaa le mkpukpu phe kpuwaa oronmono tsoru akpaminigwe l'okotazu phe; ophu ephe amaedu uzo, ephe e-shi gbalaa; kele ndu Izurelu ono, shi tsoru uzo echiegu agbaru phe oso ono kporawaru etsowa phe ugu. 21O be ge Jioshuwa; yee ndu Izurelu l'ophu humaerupho le ndu ono, gearu egearu ono wubawaru le mkpukpu ono; lenwuru-oku, shi le mkpukpu ono kpufuwaru;

ɛphe ghakoɓe wata egbushi ndu Eyayi. ²²Ndu ɔphuu shi l'ime mkpukpu ono alwu phe eje abya; mbu le ndu ɔphuu no phe l'iphu; ndu ɔphuu nodu phe lazɔ; ɛphe kwaa iphe l'echi nodu le mgbaka ndu Izurelu. Ndu Izurelu gbua phe pyaapya gbiriri jasu ɔphu ɔ dudu go ka mma loo onye lanu nahuru gbalala. ²³ɛphe kpa onye eze ndu Eyayi le ndzu; kputa iya kpujeru Jioshuwa.

²⁴O be ge ndu Izurelu gbuɛberu ndu Eyayi ono; mbu l'ɛphe gude oguechi sua phe pyaapya; jasu ɛphe bvube le mgbeɔno; mbu l'echi-egu l'eka ono, ɛphe chi-beru phe ono; ndu Izurelu g'ɛphe ha gbɛ teke ono bya awuba le mkpukpu Eyayi je egude oguechi gbushikota ndu no iya nu.

²⁵Ndu Eyayi, e gburu mboku ono rwuru unu nemadzu ukporo l'unu iri; unwoke me unwanyi. Mbu le ndu Eyayi be e gbuɛberupho mboku ono.

²⁶Kele Jioshuwa te wophuduru aka arwa iya azu. O mabeeru iya pho go maberu iya gbiriri jasu e gbube ndu bu le mkpukpu Eyayi l'ophu. ²⁷Ndu Izurelu je akpukoo iphe-edobe ndu aka ono; bya atuko iphe ndu mkpukpu ono kwaa lokwata je enworu, bu iya bu ge Chipfu suru Jioshuwa ge mee ya.

²⁸Oo ya bu; Jioshuwa woru oku tufu le mkpukpu Eyayi; mee aka ono; o buru ikpozu ojeje. Eka ono buru ochobu byasu ntanu-a. ²⁹O kputa eze ndu Eyayi je akopyabe l'eli oshi. O kporu l'eka ono gbiriri jasu l'uzenya-shi. Enyanwu gbuzeeɓho; Jioshuwa tua ekemu; e je je apazeta odzu iya l'eli oshi ono; je atogbo lonu-abata mkpukpu ono. ɛphe kwakoo mkpuma kua ya l'eli jasu o kuta l'ikpo l'ikpo. ɛphe haa ya; o nodu nno gbiriri byasu ntanu-a.

Ogbandzu, a gbaziru l'ubvu Ebalu

³⁰Noo ya; Jioshuwa bya akparu Chipfu, bu Chileke ndu Izurelu ɔrungeja l'eli ubvu Ebalu; ³¹meɛbekota iya g'onye-ozu Chipfu, bu Mosisu turu ekemu su ge ndu Izurelu meje iya lekwo ekemu Mosisu. Mbu-a; e gude mkpuma, furu ophu kpa ya; mbu mkpuma, adudu onye kujeru iya iphe-igwe gbengu. O buru l'eli iya be ɛphe gweru Chipfu ngweja-akpo-oku; waa ngweja-egu-guu. ³²Jioshuwa nodu l'iphu ndu Izurelu l'eka ono deru ekemu Mosisu ono ye le mkpuma; mbu ekemu ono, o shihawaa dee ono. ³³Ndu Izurelu l'ophu; ndu bu nlwamulwa me ndu bu okpobe Izurelu; waa ndu bu ogerenya phe; me ndu-ishi phe; me ndu-ikpe phe; pfubaru okpoko ogbandzu Chipfu ono le mgbureku labo; ghagbaru ndu-uke, bu oshilokpa Livayi, pa iya nu iphu. Ndu ono uzo lanu pfuru gha iphu l'ubvu Gerizimu; ndu ɔphuu pfuru gha iphu l'ubvu Ebalu. Mbu pfurupho egube onye-ozu Chipfu, bu Mosisu suru g'ɛphe pfuru teke ono, o turu ekemu ga goru onu-oma nu phe ono.

³⁴E mecha; Jioshuwa bya atuko ekemu ono go ha gushikotar phe; onu-oma me atu onu; mbu gueru phe iya pho ge deru iya lekwo ekemu.

³⁵ O tọ dudu mę akpuru opfu lanu, Mosisu pfuru, Jioshuwa agufutaduru; ndu Ízurelu l'ophu numakota; je akpaa l'unwanyi; waa unwegirima; mę ndu lwaru alwalwa, ephe l'ephe buru eghirigha.

Eregede, ndu Gibiyonu gbaru ndu Ízurelu

9 ¹ Tọbudu iya bu; ndu eze, bukota l'uzo enyanwu-ariba enyimu Jiódanu; ndu bu l'alí úbvú úbvú; mekpoo ndu ophu bu l'alí okpa úbvú, nọ l'uzo enyanwu-ariba; mę ndu ophu buru dee ike l'oke-enyimu ono; je akpaa l'úbvú úbvú Lébanonu; mbu ndu Hetu; waa ndu Amoru; waa ndu Kénanu; waa ndu Pérezu; waa ndu Hevu; waa ndu Jiebusu numaeopho iphe, nwuru nu ono; ² ephe dzukobe tugba nanu jeshia etso Jioshuwa yee ndu Ízurelu ogu.

³ Obenu le ndu mkpukpu Gibiyonu numaru iphe, Jioshuwa meru ndu Jeriko waa ndu Eyayi; ⁴ ephe je eworu eregede gbaa wata eme umere ge ndu duru ndu ephe no-chiru enya phe; je eworu nkirika eda-ukpo; waa akahu eda, eeyeje mee, lakashihucharu alakashihu; teme a dzukwachakwaa ya pho adzuka; woru dojicha nkapfu-igara phe edoji. ⁵ Ephe wota nkirika akpokpa, a dzukwanyaru ike bvú; woru yee. Ephe bya eworu nkirika uwe yekwapho; bya ewota buredi, kphuru nkú; bya atsua evu gude. ⁶ Noo ya; ephe bya ejepfu Jioshuwa phe l'eka ephe kpoberu ulo-ekwa phe le Gilugalu; je epfuru nu Jioshuwa yee ndu Ízurelu su phe: "Anyi bukwa ndu shi eka du enya bya g'anyi l'unu gbaa ndzu."

⁷ Ndu Ízurelu su ndu Hevu ono: "?A maru to bukwanu le mgboru anyi l'eka-a be unu bu? ?Denu g'anyi l'unu e-shi agba ndzu?"

⁸ Ephe su Jioshuwa: "Anyi bukwa ndu-ozu ngu."

Jioshuwa su phe: "?Bu onye be unu bu? Teme ?bu awe be unu shi?"

⁹ Ephe su iya: "Anyibe ndu-ozu ngu shikwa oha, du enya. Iphe, kparu anyi abyabya bukwa l'anyi numaru iphe, du biribiri, Chipfu, bu Chileke unu meru. Anyi numakotaru k'iphe, o meru; mbu k'iphe, o mekotaru l'alí ndu Ijiputu; ¹⁰ waa iphe, o meru ndu eze ndu Amoru ono ephenebo, bu l'uzo enyanwu-awawa enyimu Jiódanu; mbu Sihonu, bu eze Heshibonu; waa Ogu, bu eze ndu Beshanu, bu le mkpukpu Ashitoretu. ¹¹ Oo ya bu; ndu bu ogerenya anyi; waa onyemonye, bu l'alí anyi su anyi g'anyi kwakobe iphe, anyi e-ri l'uzo; gbeshi byatashia unu ndzuta; bya asu unu l'anyi bukwa ndu ejeru unu ozi. G'unu kwenu g'onye l'unu gbaa ndzu. ¹² Su-a; buredi anyi-a shikwa evugbaa oku teke anyi chitaru iya gude gbeshi ije mboku, anyi gbeshiru abyapfuta unu; ole lewaro enya huma le nta-a be o kposihuwaru nkú; tsuchaa evu. ¹³ Eda-a, eeyeje mee-a be shikwa buru k'ophúú teke anyi yeru iya mee. Ole lewa iya ro enya go lakashihuchaaru. Uwe anyi; mę akpokpa anyi bu g'anyi no l'uzo be o tukocharu kashihu; noo kele eka anyi shi du enya."

¹⁴ Ndu Ízurelu nata iphe, ephe gude bya eworu ria; ophu ephe ejeedu-ru akpata Chipfu ishi g'a maru g'ephe e-me iya. ¹⁵ No iya; Jioshuwa bya

ekweta l'ephe l'ephe te enwedu opfu; ephe l'ephe bya agbaa ndzụ ye iya; kweta l'ephe a-ha p̄hẹ g'ephe n̄odu ndzụ. Ndu-ishi Ízurèlu bya eworu ẹ̀go riaru p̄hẹ.

¹⁶A n̄oeph̄o ujiku ẹ̀to, ephe l̄e ndu Gibiȳonu riru nte ndzụ ono; ndu Ízurèlu n̄uma l'ephe b̄u ndu ephe l'ephe b̄u obutobu mkp̄ukpu. ¹⁷Oo ya b̄u; ndu Ízurèlu bya awufu n̄u; jeeph̄o ije ujiku ẹ̀to; ephe rwua ndu ẹ̀ka ono. Mkp̄ukpu, n̄ogbaa l'ẹ̀ka ono b̄u Gibiȳonu; waa Kefira; waa Berotu; waa Kiriyatu-Jiarimu. ¹⁸Obenu l̄e ndu Ízurèlu te etsoduru p̄hẹ ọ̀gu; noo k̄e-le ndu-ishi p̄hẹ gudewaa ẹ̀pha Chipfu, b̄u Chileke ndu Ízurèlu riaru p̄hẹ anḡu l'ephe ta abyadu etso p̄hẹ ọ̀gu.

Ndu Ízurèlu wata ata ndu-ishi p̄hẹ ụ̀ta l'ephe meru iphe, d̄u nno. ¹⁹T̄obudu iya b̄u; ndu-ishi ono g'ephe hak̄ota bya as̄u ikpoto ọ̀ha ono l'ophu: “Anyi gudeakwa ẹ̀pha Chipfu, b̄u Chileke k̄e ndu Ízurèlu riaru ndu-a nte. Nta-a ta ad̄ekwa iphe, anyi emekwadu p̄hẹ. ²⁰Iphe, anyi e-me b̄u l'anyi a-ha p̄hẹ g'ephe n̄odu ndzụ; k'ophu ejo-iphe ata abyapfutadu anyi l̄e nte ono, anyi riru p̄hẹ ono.” ²¹Ndu-ishi ono n̄odu epfukwaru p̄hẹ ph̄o s̄u p̄hẹ: “Unu g'anyi haa p̄hẹ g'ephe n̄odu ndzụ; wajēru anyi nk̄u; kujeru anyi mini.” E shi ẹ̀gube ono; ndu-ishi mee iphe ono, ephe kweru ukwe l'ephe e-me ono; mb̄u ephe par̄u ndu ono haa; ephe n̄odu d̄zụ.

²²T̄obudu iya b̄u; Jioshuwa bya ekuk̄obe ndu mkp̄ukpu Gibiȳonu; bya as̄u p̄hẹ: “?D̄enu g'o gude unu gbaberu anyi ẹ̀regede s̄u anyi l'unu shi ọ̀ha, d̄u ẹ̀nya; l'unub̄e ndu anyi l'unu t̄ukoru buru l'ẹ̀ka-a? ²³Nta-a b̄e unu buakwaa ndu a t̄uru ọ̀nu. Ọ buakwaa ohu anyi b̄e unu bya l'aburu je ad̄u-waruroya. Ọo unu a-n̄odu awa nk̄u; eku mini edo leze-ulo Chileke mu.”

²⁴Ephe s̄u Jioshuwa: “Anyībe ohu ngu b̄e a k̄ochakwaru ḡe Chipfu, b̄u Chileke unu gude t̄ua ekemu n̄u onye-oz̄i iya, b̄u M̄osisu s̄u g'o n̄u unu al̄i-a l'ophu; waf̄ua g'o t̄uko ndu bu l'al̄i-a gbushik̄otaru unu. T̄obudu iya b̄u; ndzụ unu rwutan̄u anyi. Ọ buru iphe ono, meru g'o gude anyi mee iphe ono, anyi meru ono. ²⁵Nta-a b̄e anyi n̄oakwa ngu l'ọ̀bochi-ẹ̀ka. Ọ kp̄oeph̄o g'i mee anyi iphe, d̄ukpoe ngu ph̄o ree.”

²⁶Oo ya b̄u; Jioshuwa naf̄uta p̄hẹ l'ẹ̀ka ndu Ízurèlu; ọ̀phu ephe e gbuduru p̄hẹ. ²⁷Jioshuwa woru ndu Gibiȳonu mee ndu awa nk̄u; m̄e ndu ekuru ndu Ízurèlu l'ophu mini. Ephe n̄odu awakwaph̄o nk̄u bya eku mini, eegu-deje eme iphe l'ẹ̀ka Chipfu hotaru g'o buru ẹ̀ka aa-kp̄uru iya ọ̀ru-ngweja. Ọ buru iphe ono b̄e ephe b̄u gbiriri jas̄u ntan̄u-a.

Enyanwu ekeshiru l'ẹ̀ka lanu

10 ¹T̄obudu iya b̄u; eze ndu Jierúsalem̄u, b̄u Adoni-Z̄edeku bya an̄u-ma l̄e Jioshuwa lw̄u-kpewaru ndu Eyayi; mee mkp̄ukpu p̄hẹ; ọ̀ buru mkpurupyata. Mb̄u l'o meru ndu Eyayi; ȳe onye eze p̄hẹ g'o meru ndu Jieriko; ȳe onye eze p̄hẹ. T̄eme ọ̀ bya an̄uma l̄e ndu mkp̄ukpu Gibiȳonu t̄ugburu jepfu ndu Ízurèlu; ephe l'ephe ria nte nchi-ad̄u-doo; ephe

l'ephe tũkowa buru. ²Iphe ono kwatakpoo rwua ephe le ndu ali iya l'ehu; noo kele mkpukpu Gibiyonu kwatakpooru nweru okpehu okpobe enweru; bya aburu mkpukpu, duta-be mkpa g'oha ndu eze. Tem'e o buru mkpukpu, ka ke ndu Eyayi shii; teme unwoke mkpukpu Gibiyonu buru ndu ike du l'ogu. ³Oo ya bu; Adoni-Zedeku, bu eze ndu Jierusalemu; zia ozi g'e je ezia Hohamu, bu eze ndu Hiburunu; yee Piramu, bu eze ndu Jiarumutu; yee Jiafiya, bu eze ndu Lakishi; yee Debi, bu eze ndu Egulonu; su phe: ⁴"Unu byanu bya eyetaru mu aka g'anyi je etsoo ndu mkpukpu Gibiyonu ogo; kele ephe tugburu jepfu Jioshuwa yee ndu Izurelu; ephe ria nte nchi-adu-doo."

⁵Noo ya; ndu eze ise ono, bu eze ndu Amoru ono bya edzokobe, bu iya bu eze ndu Jierusalemu; waa ke ndu Hiburunu; waa ke ndu Jiarumutu; waa ke ndu Lakishi; wafua eze ndu Egulonu. Ephe chitanu ndu ojogu phe je akpobe ulo-ekwa phe l'iphu mkpukpu Gibiyonu; bya awata etso ndu Gibiyonu ogo.

⁶Ndu Gibiyonu zia ozi g'e je zia Jioshuwa l'eka ndu Izurelu kpoberu ulo-ekwa phe le Gilugalu. Su iya: "Jiko ta agbadoshinu anyibe ohu ngu phe! Kukebero eh'u bya egwegwa bya adzoo anyi; le ndu eze ndu Amoru, bu l'ubvu ubvu dzukobeakwaru; abya anyi alwuluw."

⁷Tobudu iya bu; Jioshuwa rwutanu ndu ojogu iya l'ophu; mekpoo iphe, bu ndu ike du l'ogu; ephe shi le Gilugalu wufuta; o buru phe eje mkpukpu Gibiyonu. ⁸Chipfu su Jioshuwa: "Ba atsukwa phe ebvu; kele mu woa-kwaru phe ye ngu l'eka. O to dukwa g'ephe ha bya l'ekeru okpa latatiphu unu."

⁹Noo ya; Jioshuwa phe gude enyashi ono shi le Gilugalu tugbuja jekota ije lenyashi ono je atu phe l'uzorehu. ¹⁰Chipfu mee phe; ephe mehu butsu-butsu-butsu l'iphu ndu Izurelu. Ndu Izurelu gbua phe pyaapyaa le mkpukpu Gibiyonu gbushikpoo phe ike; chia phe kpara-kpara-kpara chipyabe phe kwaseru uzo, shiru jeshia mkpukpu Betu-Horonu; saa phe osa-mpfu l'uzo, shiru jeshia mkpukpu Azeka; waa mkpukpu Makeda (bu iya bu a -ghachaa mkpukpu Betu-Horonu). ¹¹Ephe nodu agba agbalaru ndu Izurelu ono; kwaseru uzo Betu-Horonu; eje ala mkpukpu Azeka ono; Chipfu gb'e l'imigwe wata phe atu akamini-mkpuma, paru aka; gude tugbushiahaa phe. Ndu akamini-mkpuma ono tugburu ka igwerigwe eme le ndu ophu ndu Izurelu gude ogo-echi sua pyaapyaa.

¹²Le mboku ono, Chipfu woru ndu Amoru yee ndu Izurelu l'eka ono be Jioshuwa pfuru l'iphu ndu Izurelu su Chipfu:

"Gube enyanwu; keshiru le mkpukpu Gibiyonu!

Gube onwa; kwakwaa le nsuda Ajialonu!"

¹³Oo ya bu; enyanwu keshiru l'eka-lanu; onwa keshiru l'eka o jeburu nokirishia gbiriri jas'u ndu Izurelu mee ndu ohogu phe go ghuru phe. Iphe-a be e dekwaru lekwo Jiasha; lenyanwu keshiru l'echi

akpaminigwe; ɲo ujiku ophu; ophu o riɓaduru ariɓa. ¹⁴Eshinu ta adudu mboku dujehewaru ge mboku ono; e -mecha ophu o dubaekwapho mboku ozo nwubaaru ge mboku ono; mbu mboku, Chipfu ngabejebaaru amadu nchi ge mboku ono. Ge mu gbukwaa ya tororo; o kwa Chipfu lwu-chiru ndu Izurelu ogo mboku ono.

¹⁵E mecha; Jioshuwa yee ndu Izurelu wufu lasha l'eka ephe kpoberu ulo-ekwa phe le Gilugalu.

Egbushi ndu eze ndu Amoru; ephe n'ise

¹⁶Toɓudu iya bu; ndu eze ise ono gbagɓa je ewohaa onwophe l'ogba, no le Makeda. ¹⁷A bya epfuaru Jioshuwa le ndu eze ise ono be a hu-makwaru l'eka ephe woharu onwophe l'ogba, no le mgboru mkpukpu Makeda. ¹⁸Jioshuwa su: "Unu je eswita eze mkpuma gude swichia onu ogo ono. Unu aharu nemadzɔ hota ye g'e che iya nche. ¹⁹Unu alwuro ogo, unu alwu. Unu chiru ndu ohogu unu ono oso tugɓa; unu eje atuko ndu ophu no l'uzo okotazu phe gbushia. Unu te ekwekwa gephe gbarwua mkpukpu phe; noo kele Chipfu wowaru phe ye unu l'eka."

²⁰Jioshuwa yee ndu Izurelu tuko phe mebyishikota. O phoduru nwanshii me a su lo to nweɗu me onye lanu waru nu. Ole nwa umadzu olemole, waru nu be laru le mkpukpu phe ono, bu mkpukpu, a kpshiru ike. ²¹E mecha; ndu Izurelu gephe ha wufu le chiriri le werere lapfushia Jioshuwa l'eka ephe kpoberu ulo-ekwa phe le mgboru mkpukpu Makeda; ophu o dudu onye halibaru onu k'epfuru ndu Izurelu.

²²Jioshuwa su: "Unu swifu mkpuma ono l'ogba ono; kpufutaru mu ndu eze ise-a!" ²³Oo ya bu; ephe bya akpufuta ndu eze ise ono. Mbu eze ndu mkpukpu Jierusalemu; waa ke ndu Heburonu; waa ke ndu Jiarumutu; waa ke ndu Lakishi; waa ke ndu Egulonu. ²⁴Ephe kpɔtachu Jioshuwa ndu eze ono; o bya ekuko unwoke Izurelu; bya ekua ndu-ishi ndu ojogu, bu ndu ephe l'iya swi; su phe: "Ngwa; unu bya l'eka-a bya azobeche phe okpa lolu!" Oo ya bu; ephe wufuta bya eworu okpa zobeche phe lolu.

²⁵Jioshuwa su phe: "Unu ta atsukwa ebvu; ophu meji atofukwa unu. G'obu shihukwa unu ike; ophu ndzu agukwa unu; kele oo egube-a be Chipfu e-mekota iphe, bukpo ndu ohogu unu, unu eje etso ogo." ²⁶E mecha; Jioshuwa woru ndu eze ono gbushia; woru odzu phe kobegbaa l'eli oshi iche iche uzi ise. A paru phe haa l'eli oshi l'eka ono, e kobegbaru phe ono jasɔ l'uzenyashi.

²⁷O be l'uzenyashi; Jioshuwa zia; e je ekofuta phe l'eli oshi eka ono; je eworu nwua l'ogba eka ephe shi wohaa onwophe pho. Ephe pata oke mkpuma, hagbaa shii swichia onu ogo ono. Mkpuma ono du l'eka ono gbiriri byasu ntanu-a.

²⁸O buru mboku ono be Jioshuwa lwutaru mkpukpu Makeda. O tuko ndu bu le mkpukpu ono; waa onye eze phe gbushikota. Ophu o to dudu

g'ò ka mma l'òo onye lanụ, nọ lẹ mkpụkpu ono, warụ nụ. Ọo ẹpho g'ò meru eze ndu Jieriko bụ g'ò meru kẹ ndu Makeda.

Aalwụ-kpe ndu ndòhali

²⁹Noo ya; Jioshuwa yee ndu Ízurelu g'ẹphe ha gbẹ lẹ mkpụkpu Makeda jeshia ọgu lẹ mkpụkpu Libuna. ³⁰Chipfu wokwarupho ndu mkpụkpu ono; yee eze pẹ ye ndu Ízurelu l'ẹka. Jioshuwa yee ndu Ízurelu tuko ndu bu lẹ mkpụkpu ono gbuebe. Ọphu ọ dudu g'ò ka mma l'òo onye lanụ, warụ nụ. Ọ bukwarupho g'ò meru eze ndu Jieriko bụ g'ò meru eze ndu Libuna.

³¹Tòbudu iya bụ; Jioshuwa yee ndu Ízurelu l'ọphu gbẹ lẹ mkpụkpu Libuna jeshia mkpụkpu Lakishi; je eworu ụlo-ẹkwa pẹ kpọbe l'ẹka ono; bya awata pẹ etso ọgu. ³²Chipfu bya eworu mkpụkpu Lakishi ye ndu Ízurelu l'ẹka. O be lẹ mbọku k'ẹbo; Jioshuwa lwuta iya. Ọ tukoephondu bu iya nụ gbushigbua; g'ò gbushiru ndu mkpụkpu Libuna. ³³Horamu, bu eze ndu Geza bya g'ò yeru eze ndu Lakishi ẹka; Jioshuwa pẹ lwụ-kpekwa ya phọ yele ndu ojogu iya; ọphu ọ dudu g'ò ka mma l'òo onye lanụ, warụ nụ.

³⁴Noo ya; Jioshuwa yee ndu Ízurelu l'ọphu gbẹ lẹ mkpụkpu Lakishi jeshia mkpụkpu Egunonu; je eworu ụlo-ẹkwa pẹ kpọbe l'ẹka ono; bya awata pẹ etso ọgu. ³⁵Ephe lwụ-kpee ya lẹ mbọku ono kwapho; bya egude ọgu-echi gbuebekota onyemonye, bu iya nụ; mbụ liphe, bukpo nemadzụ, bu lẹ mkpụkpu ono bẹ e gbukotaru pyaapya mbọku ono; bu nwune iphe, o meru ndu Lakishi.

³⁶Jioshuwa yee ndu Ízurelu l'ọphu bya agbẹ lẹ mkpụkpu Egunonu jeshia mkpụkpu Hẹburonu; je etsoo ndu ẹka ono ọgu. ³⁷Ephe lwuta mkpụkpu ono; bya egude ọgu-echi gbushia ndu bu iya nụ; ẹphe lẹ ndu eze pẹ; waa ndu bu lẹ mkpụkpu, nọgbaa ya mgburugburu g'ẹphe hakota. Ọphu ọ dudu m'onye lanụ, warụ nụ. E mee pẹ iphe, e meru ndu Egunonu. Mbụ l'ò tukoerupho mkpụkpu lẹ mkpụkpu ono g'ẹphe hakota; mekpoo iphe, bu nemadzụ, bukota iya nụ; sụa pyaapya.

³⁸Jioshuwa yee ndu Ízurelu l'ọphu bya alwatashia; bya abahụ lẹ mkpụkpu Debi je etsoo pẹ ọgu. ³⁹Ephe lwuta mkpụkpu ono; waa onye eze pẹ; waa mkpụkpu lẹ mkpụkpu, nọgbaa ya mgburugburu; bya egude ọgu-echi tuko pẹ gbushia; mbụ ẹphe tukuronemadzụ, bukota l'ẹka ono sụebe pyaapya; ọphu ọ dudu m'onye lanụ, wafuru nụ; bu nwune iphe, o meru ndu Hẹburonu. Noo iphe, o meru ndu Debi; yee onye eze pẹ bu ono; teme ọ bukwarupho nwune iphe, o meru ndu Libuna; yee onye eze pẹ bẹ o meru pẹ ono.

⁴⁰Ọo ya bụ; Jioshuwa pẹ tuko ndu alị ẹka ono lwụ-kpee; mbụ ndu bu l'alị úbvú úbvú; yee ndu ọphu bu l'echiegu ndòhali; waa ndu bu l'alị ọkpa úbvú, nọ l'uzo ẹnyanwu-ariba; waa ndu ọphu bu lẹ mgbaka úbvú; ẹphe lẹ ndu eze pẹ l'ọphu. Ọphu ọ dudu mẹ onye lanụ, warụ nụ. Ephe tuko

iphe, bukpuo iphe, atụ unme l'eka ono gbushikota. O mee ya pho ge Chipfu, bu Chileke ndu Izurelu turu ekemu su g'o mee ya. ⁴¹Jioshuwa phe shiepho le mkpukpu Kadeshi-Baneya lwua phe gbiriri jasụ le mkpukpu Gaza; bya atuko mkpukpu, nokota le Goshenu lwukota; je akpaa le mkpukpu Gibiyonu. ⁴²Ndu eze ono; me ali phe be Jioshuwa lwutakotaru l'akpo ephopho lanu; noo kele Chipfu, bu Chileke ndu Izurelu bu iya alwu-chiru phe ugu.

⁴³Tobudu iya bu; Jioshuwa yee ndu Izurelu mechaa bya awufu lashia l'eka ephe kpoberu ulo-ekwa phe le Gilugalu.

Aalwu-kpe ndu eze ndu isheli

11 ¹Tobudu iya bu; Jiabinu, bu eze ndu Hazo numaeppo iphemiphe ono, eme nu ono; o zia su g'e je ekua Jobabu, bu eze ndu Madonu; kukwapho eze ndu Shimuronu; waa eze ndu Akushafu; ²waa ndu eze, bu l'ali ubvu ubvu l'uzo isheli; waa ndu ophu bu le nsuda Araba, no l'uzo ndohali eze-enyimu Kineretu; waa ndu ophu bu l'ali okpa ubvu, no l'uzo enyanwu-ariba; teme wakwapho ndu bu le mgboru mkpukpu Nafatu-Doru, no l'uzo enyanwu-ariba. ³O byakwapho ezia g'e je ekua ndu Kenu ndu ophu bu l'uzo enyanwu-awawa; ephe le ndu ophu bu l'uzo enyanwu-ariba; wakwapho ndu Amoru; waa ndu Hetu; waa ndu Perezu; waa ndu Jiebusu, bugbaa l'ali ubvu ubvu; waa ndu Hevu, bu l'okpa ubvu Hamonu l'ali Mizupa. ⁴Ephe tuko rwuta ndu ojogu phe gude bya. Ndu ojogu phe haephe lotu g'aja, no l'aguga eze-enyimu. Ephe chikwarupho inya; waa ugbo-inya, du igwerigwe. ⁵Ndu eze ono g'ephe ha bya achigbabe ndu ojogu phe ono; bya eworu ulo-ekwa phe kpo be l'aguga nggele Meromu g'ephe tsoo ndu Izurelu ugu.

⁶Chipfu su Jioshuwa: "Ba atsukwa phe ebvu; kele o -rwutashia egube nta-a echele be mu woakwaru phe ye unube ndu Izurelu l'eka g'unu gbushibebe. Unu ebushikota inya phe akwara azu okpa; unu eworu ugbo-inya phe kpokota oku."

⁷Jioshuwa yee ndu ojogu ndu Izurelu wufuta; bya atụ phe l'uzorehu le nggele Meromu; daru ivoyi kpua phe. ⁸Chipfu woru phe ye ndu Izurelu l'eka; ephe lwu-kpee phe; chipyabe phe kwaseru uzo eze mkpukpu Sayidonu; me uzo mkpukpu Misurefotu-Mayimu. Ephe chikwaa phe pho shia uzo enyanwu-awawa; mbu chia phe gbiriri jasụ le nsuda Mizupa. Ephe gbua phe gbiriri jasụ teke aduedu me onye lanu, ghuduru nu. ⁹Jioshuwa mee phe ge Chipfu suru g'ephe mee phe. Ephe tuko inya phe bushikota akwara azu okpa; bya achikobe ugbo-inya phe tua oku.

¹⁰Teke ono kwapho be Jioshuwa phe wu-phuru azu je alwu mkpukpu Hazo; bya eworu onye eze phe gbua. Hazo shi buru ishi mkpukpu ono g'o hakota. ¹¹Ephe gude ugu-echi tuko nemadzu, bu le mkpukpu ono sua pyaapya; tuko phe gbuebekota; ophu o dudu g'o ka mma l'oo onye atụ

unme mę nanu, phoduru nu. E woru oku lokpua le mkpukpu Hazo; o tsufu iya.

¹² Jioshuwa tuko mkpukpu ndu eze ono g'o hakota; ephe le ndu eze phe, lwutakota; bya egude ogu-echi sukota phe pyaapya; tuko phe gbushibebe; g'onye-ozu Chipfu, bu Mosisu turu iya ekemu su g'o mee ya. ¹³ Obenu l'iphe, bukpuo mkpukpu ono, a kpuru l'eli ubvu ono be Jioshuwa phe ta akpoduru oku me nanu; gbahaa Hazo kpoloko be Jioshuwa phe kpuru oku. ¹⁴ Ndu Izurelu tuko eku ndu mkpukpu ono gweta; bya akpu-koo iphe-edobe phe le ndzu je edoberu onwophe. Obenu le nemadzu be ephe gude ogu-echi sa pyaapya; jasu teke ephe tukoru g'ephe ha gbushibebekota. ¹⁵ O buerupho ge Chipfu turu iya onye-ozu iya, bu Mosisu lekemu bu ge Mosisu turu iya Jioshuwa; teme o bukwarupho ge Jioshuwa mekotaru iya. Ophu o dukpoda me iphe lanu, o meduru l'iphemiphe ono, Chipfu turu Mosisu lekemu ono.

¹⁶ Oo ya bu; Jioshuwa phe lwutakota ali eka ono l'ophu: ndu bu l'ali ubvu ubvu; yee ndu ophu bu l'echiegu ndohali; waa ndu bu l'ali Goshe-nu l'ophu; waa ndu ophu bu l'ali okpa ubvu, no l'uzo enyanwu-ariba; waa ndu bu le nsuda Araba; mbu ndu bu l'ubvu ubvu Izurelu; yee ndu bu l'okpa ubvu iya. ¹⁷ Ephe gbę l'ubvu Halaku, no l'uzo Siye; lwuta ali ono jasu le mkpukpu Belu-Gadu, no le nsuda Lebanonu l'uzo ndohali ubvu Hamonu. O kputachaa ndu eze phe le ndzu gbushia. ¹⁸ Jioshuwa tsokpuo ndu eze ono ogu no odu. ¹⁹ A -gufu ndu Hevu, bu le mkpukpu Gibiyonu be o to dudu ndu ephe le ndu Izurelu gbabaaru ndzu. Ndu Izurelu lwutacharu ndu k'ophuu g'ephe ha. ²⁰ Kele oo Chipfu lonwiya kpo-chiru phe okpoma g'ephe tsoje ndu Izurelu ogu; k'ophu oo-shi nno gbuębe phe rengurengu; mee g'ephe chihu; g'a ta phuru phe obu-imemini, bu iya bu iphe, Chipfu turu Mosisu ekemu su g'o mee.

²¹ O bukwarupho teke ono be Jioshuwa phe byaru bya emee ge ndu Anaku chihu l'ali ubvu ubvu; me ndu ophu bu le mkpukpu Hęburonu; me ndu ophu bu le mkpukpu Debi; waa mkpukpu Anabu; waa ndu ophu bu l'ali ubvu ubvu ndu Jiuda l'ophu; wakwapho ndu bu l'ali ubvu ubvu Izurelu l'ophu. Jioshuwa tuko phe mebyishikota; ephe le mkpukpu phe. ²² Ophu o to dudu ndu Anaku, phoduru l'ali unwu Izurelu ono me onye lanu. Eka nemadzu phoduru bu le mkpukpu Gaza; waa le mkpukpu Gatu; waa le mkpukpu Ashidodu. ²³ Oo ya bu le Jioshuwa atuko ali ono l'ophu lwutakota; mbu egube ono, Chipfu suru Mosisu g'o mee ya. O lwutachaa ya; bya eworu iya keeru unwu Izurelu l'okpa-ifu l'okpa-ifu; o buru okiphe phe.

E mechaa; ali ono kabę daa jii; haa alwu ogu.

Ndu eze, Mosisu lwutaru

12 ¹ O waa bu ephe ndu eze ndu ali ono, unwu Izurelu suru pyaapya natachaa ali phe nworu l'azu enyimu Jiodanu azu iya ophu l'uzo

ɛnyanwu-awawa; a -gbɛ lɛ ndu bu lɛ nsɔda nggele Anɔnu; jasɔ lɛ ndu bu l'úbvú Hamɔnu; mɛkpoo ndu bu l'uzo ɛnyanwu-awawa nsɔda Araba.

²Eze kɛ mbɔ bɔ Sihonu, bɔ eze ndu Amoru. Yɛbedua shi buru lɛ mkpɔkpu Hɛshibonu. Alɛ-eze iya kee alɛ Giladu ɛbo; ɔ buru eze l'uzo lanɔ. Alɛ-eze iya ono gbɛ lɛ mkpɔkpu Arowa, nɔ laguga aguga nsɔda nggele Anɔnu; bya agbɛ lɛ mkpɔkpu ono, nɔ l'echilabɔ nsɔda nggele Anɔnu ono je akpaa lɛ nggele Jiaboku, bɔ oke alɛ ndu Amonu. ³O shikwapho buru eze ndu ophu bu lɛ nsɔda Araba; a -gbɛ l'uzo ɛnyanwu-awawa eze-ɛnyimu Gálili je akpaa lɛ mkpɔkpu Bɛtu-Jieshimotu, dɔ l'uzo ɛnyanwu-awawa Eze-ɛnyimu Únú; bya ago-jia shia ɔzo ndohali lufuta lɛ mgbaze mgbaze úbvú Pisiga.

⁴Onye eze ɔzo bɔ Ogu, bɔ eze ndu Beshanu. Alɛ ɛka o shi buru eze phɛ bɛ a l'wɔtakwarupho. Yɛbedua shi buru lɛ mkpɔkpu Ashitoretu; yɛe mkpɔkpu Ederayi. Ogu ono bɔ onye ikpazu l'eri Rafa. ⁵Alɛ-eze iya rwuchaaru úbvú Hamonu; waa mkpɔkpu Saleka; waa alɛ Beshanu l'ophu; je akpaa l'oke alɛ ndu Geshu; mɛ kɛ ndu Maka; mɛ nkeru-ɛbo alɛ Giladu; nɔo jasɔ ɛphe l'onye eze, bɔ Sihonu je amaa oke lɛ mkpɔkpu Hɛshibonu.

⁶Ndu eze labo ono bɔ onye-ozɛ Chipfu, bɔ Mósɛsu; yɛe ndu Ízurelu l'wɔkperu phɛ. Mósɛsu bya eworu alɛ ono nɔ ɔkpa-ipfu Rúbɛnu; waa kɛ Gadu; waa kɛ nkeru-ɛbo ɔkpa-ipfu Manáse g'ɔ buru okiphe phɛ.

Ndu eze ophu Jioshuwa l'wɔkperu l'onwiya

⁷Owa-a bɔ ndu eze ophu bu l'uzo ɛnyanwu-arɛba ɛnyimu Jiɔdanu, bɔ ndu Jioshuwa yɛe ndu Ízurelu l'wɔkpekotaru. Alɛ ndu eze ono gbɛ lɛ mkpɔkpu Belu-Gadu, nɔ lɛ nsɔda Lébanonu; je akpaa l'úbvú Halaku, nɔ l'uzo, e shi eje Siye. Jioshuwa bya eworu alɛ ono keeru ndu Ízurelu l'ɔkpa-ipfu l'ɔkpa-ipfu g'ɔ buru okiphe phɛ. ⁸Alɛ, shi tɔko yikotaru iya nɔ bɔ: alɛ úbvú úbvú; waa alɛ ɔkpa úbvú, nɔ l'uzo ɛnyanwu-arɛba; waa nsɔda Araba; waa alɛ, nɔ lɛ mgbaka mgbaka úbvú; waa oma echiɛgu; waa echiɛgu ndohali. Alɛ ono shi tɔkoru bɔkotaru alɛ ndu Hetu; waa kɛ ndu Amoru; waa kɛ ndu Kɛnanu; waa kɛ ndu Pérezu; waa kɛ ndu Hevu; mɛ kɛ ndu Jiebusu.

⁹Ndu Ízurelu l'wɔkperu onye eze ndu Jieriko;
waa onye eze ndu Eyayi, nɔ-kube mkpɔkpu Bɛtelu;

10 waa onye eze ndu Jierúsalemu;
mɛ onye eze ndu Hɛburonu;

11 waa onye eze ndu Jiarumutu;
mɛ onye eze ndu Lakishi;

12 waa onye eze ndu ɛgulonu;
mɛ onye eze ndu Geza;

13 waa onye eze ndu Debi;
mɛ onye eze ndu Geda;

- 14 waa onye eze ndu Homa;
mę onye eze ndu Aradu;
- 15 waa onye eze ndu Libuna;
mę onye eze ndu Adulamu;
- 16 waa onye eze ndu Makeda;
mę onye eze ndu Bętelu;
- 17 waa onye eze ndu Tapuwa;
mę onye eze ndu Hefa;
- 18 waa onye eze ndu Afęku;
mę onye eze ndu Lasharonu;
- 19 waa onye eze ndu Madonu;
mę onye eze ndu Hazo;
- 20 waa onye eze ndu Shimuronu-Meronu;
mę onye eze ndu Akushafu;
- 21 waa onye eze ndu Tanaku;
mę onye eze ndu Megido;
- 22 waa onye eze ndu Kadęshi;
mę onye eze ndu Jiokuneyamu, nọ l'úbvú Kamęlu;
- 23 waa onye eze ndu Doru, nọ lę Nafatu-Doru;
mę onye eze ndu Goyimu, nọ l'alı Gálili;
- 24 wafua onye eze ndu Tıza.
- Iphe, ndu eze ono tukoru du bu ndu eze ukporo l'iri lę nanu.

Alı ophu ee-mechakwapho je alwuta

13 ¹Tobudu iya bu; Jioshuwa buerupho ogerenya; bya akapfuhu-chawa akapfuhu; Chipfu su iya: “Nta be i buwaa ogerenya bya akapfuhuchawa akapfuhu; teme ali, aa-lwuta kpokwadro ke barara-a. ²Ali ndu ophu ghuduru nu, ee-je alwutafua bu onu-egu ndu Filisitayinu; waa ke ndu Geshu; ³mbu ali, gbę lę nggele Shiho, nọ l'uzo enyanwu-awawa ali ndu Ijiputu; je akpaa lę mkpukpu Ekuronu l'uzo isheli. Ali ono, ndu-ishi ndu Filisitayinu ise shi buru eze phe ono be aguchaaru yeru ali ndu Kėnanu, bu iya bu: mkpukpu Gaza; waa mkpukpu Ashidodu; waa mkpukpu Ashikelonu; waa mkpukpu Gatu; wafua mkpukpu Ekuronu. Ozoo bu ali ndu Ava, ⁴nọ l'uzo ndohali; waa ali ndu Kėnanu l'ophu; mę ndu mkpukpu Meyara, bu ali ndu Sayidonu; je akpaa lę mkpukpu Afęku, bu oke ali ndu Amoru; ⁵wafua ali ndu Gebalu; waa ali úbvú úbvú Lébanonu l'ophu l'uzo enyanwu-awawa; a -gbę lę mkpukpu Belu-Gadu, bu ndohali úbvú Hamonu; je akpaa lę mkpukpu Lebo-Hamatu; ⁶wafua ali ndu Sayidonu ndu ophu bu l'alı úbvú úbvú, nọ lę mgbaka úbvú úbvú Lébanonu; yele mkpukpu Misurefotu-Mayimu. Iphe, bu ndu ono, mu gushiru ono be mu a-chifukotaru ndu Izurelu. Ole gi tua ido gude keshiaru ndu Izurelu ali ono go buru okiphe phe; mbu ge mu suru gi keeru phe

iya ono. ⁷Ɔo ya bu; gbeshi nta-a woru alì ono keeru ọkpa-ipfu tete phọ; waa nkeru-ẹbo ọkpa-ipfu Manáse ndu ọphu ghuduru nu phọ; g'ọ buru oki-phe.”

Eeke alì, nọ l'uzo ẹnyanwu-awawa ẹnyimu Jiódanu

⁸Ọkpa-ipfu Rúbenu; waa kẹ Gadu; waa nkeru-ẹbo ọkpa-ipfu Manáse bẹ natawaru alì, onye-ozì Chipfu, bu Mósìsu nuru phẹ; l'uzo ẹnyanwu-awawa ẹnyimu Jiódanu; ⁹natakwaphọ alì, nọru jasù lẹ mkpukpu Arowa. Ndu Arowa bu lẹ nsùda ono, nọ l'aguga nggele Anonu; teme ọ buru iya bu mkpukpu ono, pharu l'echi nggele ono; mekpoo baswaa alì ono, nọ l'uzo mkpukpu Medeba; je akpaa lẹ mkpukpu Dibonu. ¹⁰Ẹphe natakwarupho alì, nọru je akpaa l'oke alì ndu Amonu l'uzo ẹnyanwu-awawa, bu iya bu mkpukpu Sihonu, bu eze ndu Amoru, shi buru lẹ mkpukpu Heshibonu; ¹¹natakwaphọ alì Giladu; waa alì ndu Geshu; waa kẹ ndu Maka; waa úbvú Hamonu l'ophu; wafua alì Beshanu l'ophu je akpaa lẹ mkpukpu Saleka; ¹²mbu alì Beshanu ono, shi buru alì-eze Ogu, bu onye phoduru nu l'oshilokpa Rafa, bu onye shi bua lẹ mkpukpu Ashitoretu; yee mkpukpu Edereyi. Ole Mósìsu lwuchawaru ndu ono; chifu phẹ l'alì ono. ¹³Obenu lẹ ndu Ízurelu ta achifuduru ndu Geshu; waa ndu Maka. Ẹphe parụ phẹ haa; ephe lẹ ndu Ízurelu tuko buru byasù ntanu.

¹⁴A bya l'okpa-ipfu Lívayi; ọphu a heduru phẹ alì; kele Chipfu kwewaru phẹ ukwe sù l'okiphe, ephe e-keta bu iphe-ngweja, a kporu ọku nu Chipfu, bu Chileke kẹ ndu Ízurelu.

Alì ọkpa-ipfu Rúbenu

¹⁵Ọkpa-ipfu Rúbenu bẹ Mósìsu mekwarupho alì ono hẹe l'ipfu l'ipfu. ¹⁶Alì nkephe shiepho lẹ mkpukpu Arowa nọduta. Ndu Arowa bu lẹ nsùda ono, nọ l'aguga nggele Anonu; teme ọ buru iya bu mkpukpu ono, pharu l'echi nggele ono; mekpoo baswaa alì ono, nọ l'uzo mkpukpu Medeba; ¹⁷waa mkpukpu Heshibonu; waa mkpukpu lẹ mkpukpu, nọkota lẹ baswaa alì, bu iya bu: Dibonu; waa Bamotu-Belu; waa Betu-Belu-Meyonu; ¹⁸waa Jiahazu; waa Kedemotu; waa Mefahatu; ¹⁹waa Kiriayatayimu; waa Sibuma; waa Zeretu-Shaha, bu iya bu mkpukpu ọphu nọ l'eli úbvú, nọ l'ime nsùda; ²⁰wafua mkpukpu Betu-Peyo; waa mkpoze úbvú Pisi-ga; wafua mkpukpu Betu-Jieshimotu; ²¹waa iphe, bukpoo mkpukpu lẹ mkpukpu, nọkota lẹ baswaa alì; mekpoo iphe, bu ohamoha ono, onye eze ndu Amoru ono, bu Sihonu shi buru lẹ mkpukpu Heshibonu buru onye-ishi phẹ ono. E mechaa; Mósìsu lwu-kpee ya; lwu-kpekwapfo ndu ishi ndu Midiyanu, bu iya bu Evi; waa Rekemu; waa Zuru; waa Huru; waa Reba. G'ephe hakota shi nochia ẹnya Sihonu bugbaaru ishi ndu alì ono. ²²Belamu nwa Beyo, bu onye jibya yi lẹ ndu ọphu ndu Ízurelu gburu l'ogu. ²³Ẹka oke alì ndu ọkpa-ipfu Rúbenu kparụ l'uzo ẹnyanwu-ariba

bù l'enyimu Jíódanu. Noo oke alì, ndu òkpa-ipfu Rúbènu ketarù bù ono. E woru mkpùkpu lẹ mkpùkpu, nògbaa ya nù; m̀kpoo unwu mkpùkpu, nò-pheru iya mgburugburu keeru phẹ l'ipfu l'ipfu.

Alì òkpa-ipfu Gadu

²⁴Òkpa-ipfu Gadu bẹ Mòsisu nùkwarupho oke alì ono; ẹphe haa l'ipfu l'ipfu. ²⁵Alì nkepẹ l'ophu bẹ mkpùkpu Jiaza yìkotakpo; mẹ iphe, b̀kòta mkpùkpu, nò l'alì Giladu l'ophu; waa alì ndu Amònu jasù lẹ mkpùkpu Arowa, bù iya bù ụzò ẹnyanwu-awawa mkpùkpu Raba. ²⁶Alì ono bya agbẹ lẹ mkpùkpu Hẹshibonu; je akpaa lẹ mkpùkpu Ramatu-Mizupa; waa mkpùkpu Betonimu. Ọ gbẹkwapho lẹ Mahanayimu nọo jasù l'oke alì Lodeba. ²⁷Mkpùkpu, nògbaa lẹ nsùda, bù iya bù Bẹtu-Haramu; waa Bẹtu-Nimura; waa Sukòtu; waa Zafònu yìchaaru iya; m̀kpoo iphe, bù ọhamoha ono, onye eze ono, bù Sihònu shi buru lẹ Hẹshibonu buru eze phẹ ono. Mkpùkpu ono b̀kòta oke alì òkpa-ipfu Gadu l'uzò ẹnyanwu-arìba ẹnyimu Jíódanu je akpaa l'eze-ẹnyimu Gálili l'uzò isheli iya. ²⁸Ono b̀kpòephe alì, e woru keeru òkpa-ipfu Gadu. E keru phẹ iya l'ẹnya-unuphu l'ẹnya-unuphu; mbù mkpùkpu lẹ mkpùkpu, nògbaa ya nù; m̀kpoo nwa mkpùkpu, nò-pheru iya mgburugburu.

Alì nkeru-ẹbo òkpa-ipfu Manáse

²⁹Nkerẹbo òkpa-ipfu Manáse bẹ Mòsisu nùkwarupho oke alì ono; ẹphe haa l'ipfu l'ipfu. ³⁰Alì nkepẹ bù ẹka o swetaru bù a -gbẹ lẹ mkpùkpu Mahanayimu; je atùko alì Beshanu l'ophu sweta; m̀kpoo ọhamoha, onye eze ono, bù Ọgu, shi buru eze ndu Beshanu waa ụkporo mkpùkpu ẹto, bù mkpùkpu ndu Jiayi; Jiayi ono nọkwapho lẹ Beshanu. ³¹Nkerẹbo alì Giladu yìkwa iya phọ; waa mkpùkpu Ashìtoretu; waa mkpùkpu Edereyi. Mkpùkpu lẹ mkpùkpu ono shi b̀chaaru ọhamoha, onye eze, bù Ọgu shi buru onye-ishi phẹ a -gbẹ lẹ Beshanu ẹka o shi buru. Ono, a gùshiru ono bù ọphu a nùru oke lanù l'oshilòkpa Makiya nwa Manáse. Ẹphe keshia ya l'ipfu l'ipfu.

Iphe, e doberu oshilòkpa Lívayi

³²Alì ono bù lẹ baswaa alì ndu Mówabu, nò l'azù ẹnyimu Jíódanu azù iya ọphuu; l'uzò ẹnyanwu-awawa mkpùkpu Jieriko; bẹ Mòsisu nọ keshia ya. ³³Obenu l'òkpa-ipfu Lívayi bẹ Mòsisu ta ahẹduru oke alì; kẹle ọ suru phẹ l'ọo Chipfu, bù Chileke kẹ ndu Ízurelù bù okiphe nkepẹ.

Eeke alì ụzò ẹnyanwu-arìba ẹnyimu Jíódanu

14 ¹Ọwaa b̀kòta alì ndu Kénanu; ibe iya ọphu ndu Ízurelù nata-gbaaru; ọ buru okiphe phẹ, bù iya bù gẹ Eleyaza, bù onye uke Chileke; waa Jioshuwa nwa Nunu; waa ndu-ishi òkpa-ipfu ndu Ízurelù

gude keeru phe iya. ²Oke ali phe ono bu ido be a turu gude keeru iya okpa-ipfu tete le nkeru-ebo iya pho, bu iya bu ge Chipfu suru Mosisu g'e mee ya. ³Mosisu nuwaru okpa-ipfu labo le nkeru-ebo iya ophuu oke ali nkephe l'uzo enyanwu-awawa enyimu Jiordanu. Obenu l'okpa-ipfu ke ndu Liviayi ta adudu ophu a nuru phe g'a nuru ndu ophuu; ⁴mbu l'okpa-ipfu Jiosefu duwaa okpa-ipfu labo, bu iya bu okpa-ipfu Manase; waa ke Ifuremu. Ndu Liviayi be a ta nuduru ali. Nwaka a nuru phe buepho mkpukpu aka ephe e-buru; yee aka ephe e-cheje iphe-edobe phe. ⁵Ndu Izurelu woru ali ono kee ge Chipfu suru Mosisu g'e kee ya.

Aanu Kalebu mkpukpu Heburonu

⁶Noo ya; ndu shi l'okpa-ipfu Jiuda wu-pfuta Jioshuwa le Gilugalu. Tobudu iya bu; Kalebu nwa Jiefune, shi l'ipfu ndu Kenazu su iya: “?O kwa li makwaduru-a iphe, Chipfu pfuru onye-ozu iya, bu Mosisu l'opfu ehu mu le ngu le Kadashi-Baneya? ⁷Iphe, mu nowaru eshinu a nwuru mu bu ukporo apha labo teke onye-ozu Chipfu, bu Mosisu no le mkpukpu Kadashi-Baneya zia mu su ge mu je anwu ngge l'ali-a. Mu jechaa bya ewota iphe, mu humaru kokotaru iya; koreru iya pho g'o du mu l'obu. ⁸Obenu le ndu ophu anyi l'ephe swi jeru je emee; ndzu rwuta ndu Izurelu. O le mbedua gudeepho obu mu g'o ha tsoru Chipfu, bu Chileke mu. ⁹Oo ya bu; o buru le mboku ono gedegede be Mosisu rifuru angu su l'ali ono, mu zoru okpa ono a-buru okiphe mu l'unwu mu jasu le tuutuutu le mimiimii; kele mu gude obu mu l'opfu etso Chipfu, bu Chileke ke yebe Mosisu.

¹⁰“Chipfu mecha mee iphe ono, o kweru mu ukwe iya ono; dobe mu ndzu; k'opfu bu le nta-a be mu nowaru ukporo apha labo l'apha ise; e -shi teke ono, o pfuru Mosisu iphe ono, bu iya bu teke ono, ndu Izurelu shi aghaphe l'echiegu ono. Waa mu baa ntanu-a; mube onye nowaru ukporo apha eno l'apha ise eshinu a nwuru mu! ¹¹Temu mu bukwaduru oya ge mu bu iya eshi teke Mosisu ziru mu ozu ono. Oo g'ike du mu teke ono bu g'o du mu nta-a k'eje ugu jee lwa. ¹²O buru iphe, mu epfu bu g'i phenaarum aka l'oboto-egu ndu-a, bu l'ali ubvu ubvu-a, bu ali aka Chipfu kweru mu ukwe iya mboku ono. O dunaa g'i numanuru-a teke ono le ndu bu l'aka ono bu oshilokpa Anaku; le mkpukpu phe paru aka; wafua l'ephe gude igbulu kpu-pee mkpukpu phe ono mgburugburu; obenu le Chipfu e-yetarum mu-a aka; mu achifu phe nata ali phe; bu iphe, o pfuru mu.”

¹³Noo ya; Jioshuwa bya agoru onu-oma nu Kalebu nwa Jiefune; bya eworu Heburonu nu iya g'o buru okiphe iya. ¹⁴Oo ya bu; mkpukpu Heburonu buru ke Kalebu nwa Jiefune, shi l'ipfu ndu Kenazu e -shi teke ono; noo kele o gude obu iya g'o ha tsoru uzo Chipfu, bu Chileke ndu Izurelu. ¹⁵Heburonu be e shi ekuje Kiriyatu-Araba. Aba ono bu nwoke, bu iya shi kachaa shii l'oshilokpa Anaku.

Oo ya bu; e mecha; ephe tuta unme k'alwu ugu.

Alì ọkpa-ipfu Jiuda

15 ¹Alì, a tūru ido; ọ dabaru ọkpa-ipfu Jiuda; ephe haa ya l'ipfu l'ipfu noru gbiriri jasū l'oke ephe lẹ ndu Edomu; l'uzo echiegu Zinu; l'eka alì ono jeberu l'uzo ndohali iya.

²Oke alì phe l'uzo ndohali gbẹ l'aguga Eze-enyimu Únú l'ibiya k'uzo ndohali; ³kwaseru uzo ndohali úbvú “akpi”; bya agbewaro l'eka ono pfu-kwaseru noo jasū l'echiegu Zinu. Teme ọ gbekwapho l'eka ono lufu lẹ ndohali mkpukpu Kadeshi-Baneya. O shijaa mkpukpu Hezuronu bahu lẹ mkpukpu Adaru; gbajia uswe bahu lẹ mkpukpu Karaka. ⁴O shikwapho l'eka ono kwaseru jasū lẹ mkpukpu Azumonu; bya anowaro lufuta l'onu nggele ndu Ijiputu. Alì phe ono l'ophu buru lẹ nggele ono bẹ ọ kparu. O buru eka alì phe jeberu l'uzo ndohali bu ono.

⁵Oke iya l'uzo enyanwu-awawa shi lẹ Eze-enyimu Únú kwaseru jasū l'eka enyimu Jiordanu asoba lẹ Eze-enyimu Únú ono.

Oke iya l'uzo isheli gbẹ l'eka ono ⁶noo jasū lẹ mkpukpu Betu-Hogula; nowaro gbiriri jasū l'uzo isheli mkpukpu Betu-Araba; jasū lẹ Mkpuma Bohanu. Bohanu ono bu nwa Rúbenu. ⁷Oke-alì ono bya agbẹ lẹ nsuda Akoru kwaseru uzo mkpukpu Debi; bya agbẹ l'eka ono kwaseru uzo ndegu jasū lẹ mkpukpu Gilugalu, no gha iphu l'úbvú Adumimu, no l'uzo ndohali nsuda nggele, no l'eka ono. O gbẹ l'eka ono pfukwaseru Enu-Shemeshi; kwaseru lufuta lẹ Enu-Rogelu. ⁸Noo ya; oke alì phe ono gbẹ lẹ nsuda Hinomu, no l'uzo ndohali mkpukpu Jiebusu, bu iya bu Jierúsalem; nyikota úbvú, no l'uzo enyanwu-ariba nsuda Hinomu; mbu l'uzo isheli nsuda Refayimu. ⁹Oke-alì ono bya agbẹ l'eli úbvú ono noo jasū l'enya-mini Nefutowa; bya agbẹ l'eka ono lufuta lẹ mgboru mkpukpu, nogbaa lẹ mgboru úbvú Efuronu; bya aswi-jia futu lẹ mkpukpu Bala, bu iya bu Kiriyatu-Jiarimu. ¹⁰O gbẹ lẹ mkpukpu Bala gbajia uzo enyanwu-ariba jasū l'úbvú Siye; shiwaro l'eka ono kwaseru uzo isheli úbvú Jiarimu, bu iya bu úbvú Kesalonu; bya eshi l'eka ono gbazeta mkpukpu Betu-Shemeshi; bya aghabua mkpukpu Timuna. ¹¹O gbẹ l'eka ono pfukwaseru úbvú, no l'uzo ndegu mkpukpu Ekuronu; bya agbajia shita mkpukpu Shikeronu; je aghabua úbvú Bala; bya erwua Jiabunelu. Oke iya jeeppo je asube leze-enyimu.

¹²Oke iya l'uzo enyanwu-ariba bu Eze Enyimu.

Noo g'e gude meeru ọkpa-ipfu Jiuda alì bu ono; ephe haa ya l'ipfu l'ipfu.

Qtuniyelu alwuta mkpukpu Debi

(Ikpe 1:10-15)

¹³No iya; ọ buru l'eka oke alì ọkpa-ipfu Jiuda du bẹ Jioshuwa meru alì nu Kalebu nwa Jiefune. O buru egube ono bẹ Chipfu tūru iya ya l'ekemu

sù g'o mee ya. Alì ẹ̀ka ọ̀ nùru iya bụ̀ mkpụ̀kpụ̀ Kiriyatu-Araba, bụ̀ iya bụ̀ Hẹ̀buronu. Aba ono bụ̀ nna Anaku. ¹⁴Kalẹ̀bu bya agbẹ̀ lẹ̀ Hẹ̀buronu chífu ipfu ndu Anaku ẹ̀phe n'ẹ̀to, bụ̀ iya bụ̀ ndu Sheshayi; waa ndu Ahimanu; waa ndu Talumayi. G'ẹ̀phe ha tukuru bụ̀ru oshilọ̀kpa Anaku. ¹⁵Ọ̀ gbẹ̀ l'ẹ̀ka ono jeshia ndu mkpụ̀kpụ̀ Debi ọ̀gu. Iphe, e shi ekuje Debi bụ̀ Kiriyatu-Sefa. ¹⁶No iya; Kalẹ̀bu sù: "Onye -gbẹ̀shikpowaru je alwua ndu Kiriyatu-Sefa lwuta; mu ekee onye ọ̀bu nwatibe mu, bụ̀ Akusa g'ọ̀ luru." ¹⁷Ọ̀ bụ̀ru Ọ̀tuniyelu nwa Kenazu, bụ̀ nwune Kalẹ̀bu bẹ̀ jeru alwuta mkpụ̀kpụ̀ ono. Ọ̀o ya bụ̀; Kalẹ̀bu kee ya nwada iya ono, bụ̀ Akusa; ọ̀ luru.

¹⁸Ọ̀ lwaẹ̀pho ibe Ọ̀tuniyelu; ọ̀ sù iya g'o je epfuaru nna iya, bụ̀ Kalẹ̀bu g'ọ̀ wẹ̀ ya alì.

Akusa bya enyizeta l'eli nkapfụ̀-igara iya; Kalẹ̀bu jia ya sù: "?Bụ̀ gunu bẹ̀ mu e-meru ngu?"

¹⁹Ọ̀ sù iya: "Menaarụ̀ mu iphe-oma. Eshinu ì sùru gẹ̀ mu laa echiegu ndohali; nufunaa mu alì l'ẹ̀ka mini, anwù shokoshoko." Ọ̀o ya bụ̀; Kalẹ̀bu bya eworu ẹ̀ka mini anwù shokoshoko l'ẹ̀ka dũ dagere-dagere mẹ̀ l'ẹ̀ka bụ̀ ọ̀hu iya woru nù iya.

²⁰Waa oke alì, e meru nù ọ̀kpa-ipfu Jiuda l'ipfu l'ipfu g'ọ̀ bụ̀ru okiphe phe baa: ²¹Mkpụ̀kpụ̀, a nùgbaru ọ̀kpa-ipfu Jiuda l'alì ndu ndohali lẹ̀ mgboru oke alì ndu Edomu bụ̀: Kabuzelu; waa Eda; waa Jiagu; ²²waa Kina; waa Dimona; waa Adada; ²³waa Kadeshi; waa Hazo; waa Itunanu; ²⁴waa Zifu; waa Telemu; waa Beyalotu; ²⁵waa Hazo Hadata; waa Keriyotu-Hẹ̀zuronu, bụ̀ iya bụ̀ Hazo; ²⁶waa Amamu; waa Shema; waa Molada; ²⁷waa Haza-Gada; waa Heshimonu; waa Bẹ̀tu-Pẹ̀letu; ²⁸waa Haza-Shuwalu; waa Biye-Sheba; waa Biziyotiya; ²⁹waa Bala; waa Imu; waa Ezemu; ³⁰waa Ẹ̀lutoladu; waa Kesilu; waa Homa; ³¹waa Zikulagu; waa Madumana; waa Sansana; ³²waa Lebawotu; waa Shilihimu; waa Ayinu; wafua Rimonu. Iphe, ọ̀ tukuru dũ bụ̀ ọ̀kporo mkpụ̀kpụ̀ lẹ̀ mkpụ̀kpụ̀ tete; yẹ̀e unwu mkpụ̀kpụ̀, nọ̀gbaa phe mgburugburu.

³³Ẹ̀ka a nùru ọ̀kpa-ipfu Jiuda l'alì ọ̀kpa úbvú, nọ̀ l'uzo ẹ̀nyanwu-ariba bụ̀ Ẹ̀shutolu; waa Zora; waa Ashuna; ³⁴waa Zanowa; waa Enu-Ganimu; waa Tapuwa; waa Enamu; ³⁵waa Jiarumutu; waa Adulamu; waa Soko; waa Azeka; ³⁶waa Sharayimu; waa Aditemu; waa Gederu; wafua Gederotayimu. Iphe, ọ̀ dũ bụ̀ mkpụ̀kpụ̀ iri l'eno; yẹ̀e unwu mkpụ̀kpụ̀, nọ̀gbaa phe mgburugburu.

³⁷Wafua Zenanu; waa Hadasha; waa Mìgudalu-Gadu; ³⁸waa Dilanu; waa Mizupa; waa Jiokutelu; ³⁹waa Lakishi; waa Bozukatu; waa Egulun; ⁴⁰waa Kabonu; waa Lahumamu; waa Kitulishi; ⁴¹waa Gederotu; waa Bẹ̀tu-Dagonu; waa Nama; wafua Makeda. Iphe, ọ̀ dũ bụ̀ mkpụ̀kpụ̀ iri l'ishii; yẹ̀e unwu mkpụ̀kpụ̀, nọ̀gbaa phe mgburugburu.

⁴²Wafua Libuna; waa Eta; waa Ashanu; ⁴³waa Ifuta; waa Ashuna; waa Nezibu; ⁴⁴waa Keyila; waa Akuzibu; wafua Maresha. Iphe, ọ̀ dũ bụ̀ mkpụ̀kpụ̀ tete; yẹ̀e unwu mkpụ̀kpụ̀, nọ̀gbaa phe mgburugburu.

45 Ọzo bụ mkpụkpu Ẹkuronu; yee mkpụkpu ọzo, nọgbaa lẹ mgboru ẹka ono; yee unwu mkpụkpu, nọgbaa phe mgburugburu. 46 Ọzo bụ iphe, bụ mkpụkpu, nọ lẹ mgboru Ashidodu; lẹ mgbaka ọzo enyanwu-ariba mkpụkpu Ẹkuronu; yee eze-enyimu. 47 Ọzo bụ mkpụkpu Ashidodu lonwiya; waa mkpụkpu Gaza; waa mkpụkpu ọzo, nọgbaa lẹ mgboru ẹka ono; waa nwa mkpụkpu, nọgbaa iphe, bụ mkpụkpu ono mgburugburu; gbiriri je akpaa lẹ ngele, bụ oke alị ndu Ijiputu; waa l'oke-enyimu.

48 Ọwaa bụ mkpụkpu, nọ l'alị úbvú úbvú, a nuru okpa-ipfu Jiuda baa: Shamiru; waa Jiatiru; waa Soko; 49 waa Dana; waa Kiriyatu-Sana, bụ iya bụ Debi; 50 waa Anabu; waa Eshutemowa; waa Animu; 51 waa Goshenu; waa Holonu; wafua Gilo. Iphe, ọ dū bụ mkpụkpu iri lẹ nanu; yee unwu mkpụkpu, nọgbaa phe mgburugburu.

52 Wafua Arabu; waa Duma; waa Eshanu; 53 waa Jianimu waa Betu-Tapuwa; waa Afeka; 54 waa Humuta; waa Kiriyatu-Araba, bụ iya bụ Heburonu; waa Ziyọ. Iphe, ọ dū bụ mkpụkpu tete; yee unwu mkpụkpu, nọgbaa phe mgburugburu.

55 Wafua Mawonu; waa Kamelu; waa Zifu; waa Jiuta; 56 waa Jiezerelu; waa Jiokudeyamu; waa Zanowa; 57 waa Kenu; waa Gibiya; wafua Timina. Iphe, ọ dū bụ mkpụkpu iri; yee unwu mkpụkpu, nọgbaa phe mgburugburu.

58 Wafua Haluhulu; yee Betu-Zuru; waa Gedo; 59 waa Maratu; waa Betu-Anotu; wafua Elitekonu. Iphe, ọ dū bụ mkpụkpu ishii; yee unwu mkpụkpu, nọgbaa phe mgburugburu.

60 Wafua Kiriyatu-Belu, bụ iya bụ Kiriyatu-Jiarimu; waa Raba. Iphe, ọ dū bụ mkpụkpu labo; yee nwa mkpụkpu, nọgbaa ya mgburugburu.

61 Ọwaa bugbaa mkpụkpu, nọ l'echiegu, a nuru okpa-ipfu Jiuda: Betu-Araba; waa Midinu; waa Sekaka; 62 waa Nibushanu; waa Unu; waa Enu-Gedi. Iphe, ọ dū bụ mkpụkpu ishii; yee unwu mkpụkpu, nọgbaa phe mgburugburu.

63 Ophu ndu Jiuda adudu ike chifu ndu Jiebusu, bu lẹ Jierusalemu. Ndu Jiuda ephe lẹ ndu Jiebusu ono bua eghirigha e -shi teke ono byasu ntanu-a.

Alị okpa-ipfu Ifuremu waa Manase

16 1 Oke alị ophu a turu ido gude hee oshilokpa Jiosefu; gbẹ l'uzo enyanwu-awawa obvu mini ke mkpụkpu Jieriko, nọ lẹ mgboru enyimu Jiodanu; ghata mkpụkpu Jieriko; kwaseru echiegu lufu l'alị úbvú úbvú je akpaa lẹ mkpụkpu Betelu. 2 O shi lẹ mkpụkpu Betelu kwaseru mkpụkpu Luzu; bya eshi l'eka ono rwua mkpụkpu Atarotu, nọ l'alị ndu Aku. 3 O gbẹ l'eka ono kwaseru ọzo enyanwu-ariba lufu l'oke ephe lẹ ndu Jiafuleti; noduwaro egube ono kwaseru alị ndu Betu-Horonu; shiwaro l'eka ono nọo jasụ lẹ mkpụkpu Geza; o kwaseru je asube l'eze-enyimu.

⁴Noo oke alì, òkpa-ipfu Manáse; yee ke Ifuremu, oshilòkpa Jiósèfu nataru g'ò buru okiphe phe.

⁵Waa g'oke alì oshilòkpa Ifuremu l'ipfu l'ipfu jeru baa: O gbè le mkpukpu Atarotu-Ada, nò l'uzo enyanwu-awawa kwasèru mkpukpu Bètu-Horonu ophu nò l'uzo eli iya; ⁶shikwaphò l'èka ono nòo jasù l'eze-ènyimu; l'uzo ndòhali mkpukpu Mikumetatu. O gbè l'èka ono gbajia uzo enyanwu-awawa nòo jasù le mkpukpu Tanatu-Shilo; bya agbè l'èka ono p'fukwaseru uzo enyanwu-awawa nòo jasù le mkpukpu Jianowa. ⁷O gbèwaro l'èka ono gbazeta jasù le mkpukpu Atarotu; waa mkpukpu Nara; bya ehuru èhu le mkpukpu Jieriko; gbè l'èka ono lufuta l'ènyimu Jiòdanu. ⁸L'ibiya ophu bè oke alì ndu Ifuremu gbè le mkpukpu Tapuwa kwasèru lufu le nggele Kana; nòwaro nno kpòda l'eze-ènyimu. Ono bukota oke alì ndu Ifuremu l'ipfu l'ipfu; ⁹yee mkpukpu olemole ozo, e bufuru ndu Ifuremu l'alì ophu a nuru ndu Manáse.

¹⁰Ole ephe ta achifuduru ndu Kénanu, bu le mkpukpu Geza. Ephe le ndu Ifuremu buru eghirigha byasù ntanù-a; ephe nòdu ekebutajè ndu Kénanu ono g'ephe jeru phe ozi.

17 ¹Owaa bu òkè alì ophu a turu ido gude keeru oshilòkpa Manáse; kele o o ya bu òkpara Jiósèfu. Òkpara Manáse, bu Makiya, bu nna Giladu bè a nùwaru alì Giladu; waa alì Beshanu, nò l'uzo enyanwu-awawa ènyimu Jiòdanu. Noo kele o goshiru l'ò bu onye ike dù l'ogu. ²A t'ukwapho ido gude mee alì nù òkpa-ipfu Manáse ophu ghuduru nù; ephe haa l'ipfu l'ipfu, bu iya bu unwu Abiyeza; waa unwu Heleku; waa unwu Asurelu; waa unwu Shekemu; waa unwu Hefa; waa unwu Shemida. G'ephe ha tukoru bukotarù unwu Manáse; Manáse bukwanuru nwatibe Jiósèfu. O buru g'ephe harù alì ono l'ipfu l'ipfu bu ono.

³A bya le Zelofehadu; yèbedua ta nwutaduru nwa nwoke. Oo unwu nwa nwanyì bè o nwushiru. Zelofehadu ono bu nwa Hefa; Hefa buru nwa Giladu; Giladu buru nwa Makiya; Makiya bukwanuru nwa Manáse. Ephe unwanyì ono, Zelofehadu nwushiru ono bu Mahula; yee Nuwa; yee Hogula; yee Milika; yee Tiza. ⁴Unwu iya unwanyì ono wuru bya ejepfu onye uke Chileke, bu Eleyaza; waa Jioshuwa nwa Nunu; yee ndu bu ndu-ishi je asù phe: "Chipfu tukwaru ekemu nù Mòsisu sù iya g'ò hée anyi oke alì g'a heru unwunna anyi phe." Oo ya bu; Jioshuwa bya emeepho gè Chipfu pfuru; mee alì nù phe g'a nuru unwunna phe. ⁵Òkpa-ipfu Manáse bè a nuru uzo alì iri; a -gufukwa alì Giladu; waa alì Beshanu, bu ophu nò l'uzo enyanwu-awawa ènyimu Jiòdanu azù iya ophu; ⁶kele unwuada Manáse bè a nuru alì g'a nuru unwu iya unwoke. Unwu Manáse ndu ophu buru alì Giladu bu oke alì phe.

⁷Alì ndu Manáse shi l'oke ephe l'òkpa-ipfu Asha nòo je akpaa le mkpukpu Mikumetatu, bu uzo enyanwu-awawa mkpukpu Shekemu. Oke alì ono gbè l'èka ono kwasèru uzo ndòhali; kpabuta ndu bu le Enu Tapuwa yekòbè iya.

⁸Alì ndu Tapuwa l'ophu bukota kẹ ndu Manáse; obenu lẹ mkpukpu Tapuwa ọbu gẹdegede laaru ndu Ifuremu; kele ọ nọ lẹ mgbaka ndu Manáse ephẹ lẹ ndu Ifuremu. ⁹Oke alì ono gbẹ l'ẹka ono kwasẹru ọzo ndohali lufu lẹ nsuda nggele Kana. O nweru mkpukpu olemole, nọ l'ọzo ndohali nggele ono, bu kẹ ndu Ifuremu. Ọle alì ono bu ndu Manáse nwe iya. Oke alì ndu Manáse gbẹ l'ẹka ono laphu azu l'ọzo ndegu nggele ono bya akwasẹru nno jasụ l'eze-enyimu. ¹⁰Alì ono l'ọzo ndohali nggele ono bẹ bu kẹ ndu Ifuremu; ọzo isheli buru kẹ ndu Manáse. Nkepẹ nọru je akpaa l'eze-enyimu; ephẹ lẹ ndu Asha je amaa oke l'ọzo isheli; ephẹ lẹ ndu Isaka je amaa oke l'ọzo ẹnyanwu-awawa.

¹¹Lime alì ndu Isaka; waa kẹ ndu Asha bẹ o nweru mkpukpu olemole, bu kẹ ndu Manáse, bu iya bu Bẹtu-Shanu; waa Ibulamu; mękwapho mkpukpu kẹ ndu Dọru; waa Enu-Dọru; mę Tanaku; mękwapho Megido; tẹme wakwapho ndu bupheru iya mgburugburu. Mkpukpu ophu kwe k'eto lẹ mkpukpu ono, a gushiru ono bu Nafatu.

¹²Ọle oshilokpa Manáse ta adudu ike chifu ndu Kėnanu, bu lẹ mkpukpu ono; ndu Kėnanu buerupho l'alì ono g'ephe bu iya. ¹³O be gẹ ndu Ízurelu nonyaru bya evuta kapyabẹ ndu Kėnanu; ephẹ kebuta ndu Kėnanu; ephẹ jeahaaru pẹ ozi; ophu ephẹ achifuduru pẹ achifu.

¹⁴O -rwua ujiku lanu; oshilokpa Jiófẹfu jepfu Jioshuwa je asu iya: “?Denu g'ọ nwuru ọ bu uzi alì lanu kpoloko bẹ a turu ido nu anyi sụ g'ọ buru oke alì anyi; l'anyi bẹ ndu Chileke keberu l'oma mee; anyi buru ndu du igwerigwe egube-a?”

¹⁵Jioshuwa sụ pẹ: “Ọ -buru l'unu ha l'igwe k'ophu bu l'alì úbvú úbvú ndu Ifuremu paru unu nwanshii; unu je asuta ọswa l'alì ndu Pérezu; waa k'oshilokpa Rafa yebaa ya!”

¹⁶Oshilokpa Jiófẹfu ono sụ iya: “Alì úbvú úbvú ono ta asukwa anyi; tẹme ndu Kėnanu, bu lẹ nsuda nsuda, nọ lẹ mgboru ẹka ono buru ndu nwechaaru ugbo-inya, e meru l'igwè; mbu ndu bu lẹ Bẹtu-Shanu; mę ndu bupheru iya mgburugburu; waa ndu bu lẹ nsuda Jiezerelu.”

¹⁷Jioshuwa sụ oshilokpa Jiófẹfu, bu iya bu ndu Ifuremu; waa ndu Manáse: “Unu du igwe shii; tẹme okpehu du unu; ọ to budu uzi alì lanu kpoloko bẹ ido iya a-dabarụ unu. ¹⁸Alì úbvú úbvú l'ophu a-buru k'unu. Ọ bu eviya l'oswa du iya. Unu sụ ya; g'oke iya g'ọ hakota bukotarụ k'unu. A makwaru-a lẹ ndu Kėnanu bẹ nweru ugbo-inya, e meru l'igwè; tẹme okpehu du pẹ; ọle unu a-du-a ike chishichaa pẹ l'ẹka ono!”

Eeme alì ophu ghuduru nu

18 ¹Ndu Ízurelu g'ephe ha bya edzukọbe lẹ mkpukpu Shilo; woru ulo-ekwa-ndzukọ kpọbe. Ephẹ sepyabewaa alì ono; ọ nodukota pẹ l'ẹka. ²Ọle okpa-ipfu Ízurelu ẹsaa teke anatadu oke alì nkepẹ.

³Ọo ya bu; Jioshuwa sụ ndu Ízurelu: “?Bukpoo teke ole bẹ unu a-noberu; tẹme unu atugbua je anata alì ono, Chipfu, bu Chileke kẹ nna unu

oche phe nuru unu ono? ⁴Ngwa; g'okpa-ipfu nonu hota unwoke eto eto g'ephe bya ge mu zia phe g'ephe je agbaphe ali ono; bya edee ya l'ekwo koo g'ee-gude kee ya. Epehe -meebe nno; epehe ewotaru mu iya. ⁵Ali ono be epehe e-ke uzi esaa. Ndu Jiuda a-nodu l'ali ophu a nuru phe l'uzo ndohali; ndu Jiosesu anodu l'ophu a nuru phe l'uzo isheli. ⁶Unu pfua g'ee-me ali ono uzo esaa; dee ya l'ekwo; unu abya epfuaru mu g'unu meru iya; mu atua ido l'iphu Chipfu, bu Chileke anyi g'unu gude haa ya. ⁷Unu te emekwa ali gbaa ndu Liviya; kele okiphe nkephe bu abubu ono, epehe bu ndu-uke Chileke ono. Teme ophu ndu Gadu; waa ndu Rubenu; waa ndu Manase aka lanu ahatakwapo ali ono; kele epehedua be a nuwaru oke ali nkephe l'uzo enyanwu-awawa enyimu Jiodanu. O buru onye-ozu Chipfu, bu Mosisu be nuru phe ali nkephe.”

⁸Tobudu iya bu; unwoke ono wu-lihuepho g'ephe je emee ali ono dee ya l'ekwo; Jioshuwa nmaaru phe okwa su phe: “Unu tugbua je ejedzuru ali ono mgburugburu; unu edee go gbaru l'ekwo wotaru mu; ge mu nodu l'eka-a tua ido l'iphu Chipfu le Shilo l'eka-a g'unu gude haa ya.” ⁹Oo ya bu; unwoke ono tugbua je ejedzuru ali ono. Epehe bahu le mkpukpu le mkpukpu ozo je emee ali ono uzo esaa; dekota g'ali ono gbaru l'ekwo; wolataru Jioshuwa l'eka ndu Izurelu koberu ulo-ekwa phe le Shilo. ¹⁰Jioshuwa bya atuaru phe ido l'iphu Chipfu le Shilo; shi nno doziaru ndu Izurelu ali ono; epehe haa le ge keru iya.

Ali ndu Benjaminu

¹¹Ido ono daaru okpa-ipfu Benjaminu l'ipfu l'ipfu. Ali ophu a nuru phe nodu le mgbaka ali ndu Jiuda yee ke ndu Jiosesu.

¹²Luzo isheli be oke ali phe gbete lenyimu Jiodanu noo jasuluzo ibiya k'isheli mkpukpu Jeriko; bya adasweru ali ubvu ubvu l'uzo enyanwu-ariba; gbete l'eka ono lufuta lechiegu, no le mkpukpu Betu-Avenu. ¹³Oke ali phe ono gbete l'eka ono dasweru uzo mkpukpu Luzu; mbu lo jeerupho je adakoru Luzu, bu iya bu Betelu; l'uzo ndohali; bya agbe l'eka ono gbazeta le mkpukpu Atarotu-Ada l'eli ubvu, no l'uzo ndohali mkpukpu Betu-Horonu.

¹⁴Oke ali ndu Benjaminu gbete l'ubvu, gharu iphu le mkpukpu Betu-Horonu l'uzo ndohali; gbajia uzo ndohali; kwaseru uzo enyanwu-ariba ubvu ono; bya alufuta le Kiriyatu-Belu, bu iya bu Kiriyatu-Jiarimu, bu mkpukpu, no l'ali ndu Jiuda. Noo oke ali ndu Benjaminu k'uzo enyanwu-ariba bu ono.

¹⁵Luzo ndohali be o gbete l'oke Kiriyatu-Jiarimu; pfukwaseru lufu le mgboru enya-mini Nefutowa. ¹⁶Oke ali ono bya agbe l'eka ono dasweru okpa ubvu, no gha iphu le nsuda Hinomu; mbu l'uzo isheli nsuda Refayimu. O gbete l'eka ono gbazeta le nsuda Hinomu, no l'uzo ndohali mkpukpu Jiebusu; jee jasulufu le Enu-Rogelu. ¹⁷O gbete l'eka ono gbajia uzo isheli lufu l'uzo mkpukpu

Enu-Shemeshi; nowaro jasu le mkpukpu Gelilotu, no gha iphu l'ubvu Adu-mimu; gbe leka ono gbafu le Mkpuma Bohanu. Bohanu ono bu nwa Rubenu. ¹⁸ O gbekwapho leka ono noo jasu l'uzo isheli mkpukpu Betu-Araba; gbe leka ono lufu le nsuda Araba. ¹⁹ O kwaseru uzo isheli mkpukpu Betu-Hogula; bya ebufuta l'uzo isheli Eze-enyimu Unu leka enyimu Jiodanu asoba leze-enyimu ono l'uzo ndohali. Noo oke ali ndu Benjiaminu k'uzo ndohali bu ono.

²⁰ L'uzo enyanwu-awawa be oke iya bu lenyimu Jiodanu. Ono bu oke ali ndu Benjiaminu. O bu ali nkephe bu ono gbaa mgburugburu; o buru gephe haru ali phe bu ono l'ipfu l'ipfu.

²¹ Waa mkpukpu, bu k'okpa-ipfu Benjiaminu l'ipfu l'ipfu baa: Jieriko; waa Betu-Hogula; waa Emeku-Kezizu; ²² waa Betu-Araba; waa Zemariyimu; waa Betelu; ²³ waa Ava; waa Para; waa Ofura; ²⁴ waa Kefa-Amoni; waa Ofuni; wafua Geba. Iphe, o du bu mkpukpu iri lebo; yee unwu mkpukpu, nogbaa phe mgburugburu.

²⁵ Mkpukpu ozo bu ke ndu Benjiaminu bu Gibiyonu; waa Rama; waa Berotu; ²⁶ waa Mizupa; waa Kefira; waa Moza; ²⁷ waa Rekemu; waa Ipelu; waa Tarala; ²⁸ waa Zela; waa Helefu; waa mkpukpu ndu Jiebusu, bu iya bu Jierusalemu; waa Gibiya; waa Kiriyatu-Jiarimu. Iphe, o du bu mkpukpu iri leno; yee unwu mkpukpu, nogbaa phe mgburugburu.

Ono bu go hakota; mbu okiphe unwu Benjiaminu; ge keru iya l'ipfu l'ipfu.

Ali ndu Simiyonu

19 ¹ A bya atua ido k'ebos; o daaru okpa-ipfu Simiyonu l'ipfu l'ipfu. Oke ali, a nuru phe no l'ime ali ndu Jiuda.

² Mkpukpu, yi l'ophu a nuru phe bu: Biye-Sheba, bu iya bu Sheba; waa Molada; ³ waa Haza-Shuwalu; waa Bala; waa Ezemu; ⁴ waa Elutoladu; waa Betulu; waa Homa; ⁵ waa Zikulagu; waa Betu-Makabotu; waa Haza-Susa; ⁶ waa Betu-Lebawotu; wafukwapho Sharuhenu. Iphe, o du bu mkpukpu iri leto; yee unwu mkpukpu, nogbaa phe mgburugburu.

⁷ Mkpukpu ozo, yikwapho l'ali ndu Simiyonu bu Ayinu; waa Rimonu; waa Eta; wafua Ashanu. Iphe, o du bu mkpukpu eno; yee unwu mkpukpu, nogbaa phe mgburugburu; ⁸ mewaro iphe, bu unwu mkpukpu ozo, no-phegbaaru mkpukpu ono, a gushiru ono mgburugburu; je akpaa le Balatu-Biye, bu iya bu Rama, du lechiegu ndohali.

Noo oke ali, a nuru okpa-ipfu Simiyonu l'ipfu l'ipfu bu ono. ⁹ Ali ke ndu Simiyonu bu ali, a wataru l'ali ophu a nuru ndu Jiuda; noo kele ophu a nuru oshilokpa Jiuda paru aka k'ophu bu lephe ta adudu ike buchia ya. Noo iphe, meru go gude a wata ali ndu Jiuda nu phe.

Ali ndu Zebulonu

¹⁰ A bya atua ido k'eto; o daaru Zebulonu l'ipfu l'ipfu. Oke ali nkephe kparu le Saridi. ¹¹ O gbe leka ono kwaseru uzo enyanwu-ariba mkpukpu

Marala; bya eshita mkpukpu Dabeshetu; bya anodu nno gbiriri jasụ lẹ nggele, nọ gha iphu lẹ mkpukpu Jiokuneyamu. ¹²L'ibiya kẹ mkpukpu Saridi bẹ ọ kwaseru ọzo ẹnyanwu-awawa jasụ l'oke alị ndu mkpukpu Kisulotu-Tabo; shiwaro l'eka ono nọo jasụ lẹ mkpukpu Daberatu; bya ejerwucha mkpukpu Jiafiya. ¹³Oo ya bu; ọ kwasekpoerupho ọzo ẹnyanwu-awawa lufu lẹ mkpukpu Gatu-Hefa; waa mkpukpu Etu-Kazinu; o bufuta lẹ mkpukpu Rimonu; bya ekwojia okotazu Mkpukpu Neya. ¹⁴O -rwua eka ono; ọ kwaseru ọzo ndegu lufu lẹ mkpukpu Hanatonu; je akpaa lẹ nsuda Ifutahelu. ¹⁵Mkpukpu, nọ l'oke ibe iya ono bu Katatu; waa Nahalolu; waa Shimuronu; waa Idala; wafua Betulehemu. Iphe, ọ tukoru du bu mkpukpu iri l'ebo; yee unwu mkpukpu, nogbaa phe mgburugburu. ¹⁶Mkpukpu ono; yee unwu mkpukpu ono, nọ-pheru phe mgburugburu ono tukoru buru okiphe ndu Zebulonu l'ipfu l'ipfu.

Alị ndu Isaka

¹⁷O -rwua l'ido k'eno; ọ daaru ndu Isaka l'ipfu l'ipfu. ¹⁸Mkpukpu, nọ l'alị ophu a nuru phe bu:

Jiezerelu; waa Kesulotu; waa Shunemu; ¹⁹waa Hafarayimu; waa Shi-yonu; waa Anaharatu; ²⁰waa Rabiti; waa Kishonu; waa Ebezu; ²¹waa Remetu; waa Enu-Ganimu; waa Enu-Hadahu; wafua Betu-Pazezu. ²²Oke alị phe rwuchaaru ubvu Tabo; waa Shahazuma; waa Betu-Shemeshi; shi l'eka ono lufu l'enyimu Jiordanu. Iphe, ọ tukoru du bu mkpukpu iri l'ishii; yele unwu mkpukpu, nogbaa phe mgburugburu.

²³Mkpukpu ono; yee unwu mkpukpu ono, nogbaa ya mgburugburu ono go ha tukoru buru k'okpa-ipfu Isaka. Ephe kee ya l'anya-unuphu l'anya-unuphu me lẹ mkpukpu lẹ mkpukpu waa lonu-egu lonu-egu.

Alị ndu Asha

²⁴A bya atua ido k'ise; ọ daaru okpa-ipfu Asha l'ipfu l'ipfu. ²⁵Mkpukpu, nọ l'alị ophu a nuru phe bu:

Helukatu; waa Hali; waa Betenu; waa Akushafu; ²⁶waa Alameleku; waa Amadu; wafua Mishalu. Eka a kparu oke alị obu l'uzo ẹnyanwu-ariba bu ubvu Kamelu; waa mkpukpu Shihō-Libinatu. ²⁷O bya agbajia uzo ẹnyanwu-awawa shita Betu-Dagonu; bya erwua alị ndu Zebulonu; waa nsuda Ifutahelu; bya agbe l'eka ono kwaseru uzo ndegu jasụ lẹ mkpukpu Betu-Emeku; waa mkpukpu Niyelu; bya aghabua mkpukpu Kabulu l'uzo ekicha. ²⁸O kwaseru egube ono shita mkpukpu Eburonu; waa Rehobu; waa Hamonu; wafua Kana; jasụ o rwua eze mkpukpu ono, bu Sayidonu. ²⁹Oke alị ono bya agbe l'eka ono laphu azu kwaseru uzo mkpukpu Rama; bya erwua mkpukpu Taya, bu mkpukpu, a kpu-pheru igbulo mgburugburu. O bya agbe l'eka ono gbajia uswe lufu lẹ mkpukpu Hosa; bya ebufuta leze-enyimu. Mkpukpu, nogbaa l'ime alị ono bu Mahalabu; waa Akuzibu; ³⁰waa

Uma; waa Afeku; wafua Rehobu. Iphe, o tukoru du bu ukporo mkpukpu le mkpukpu labo; yee unwu mkpukpu, nogbaa ya mgburugburu.

³¹Mkpukpu le mkpukpu ono; yele unwu mkpukpu, no-pheru iya mgburugburu ono g'o ha tukoru buru okiphe okpa-ipfu Asha. Ephe haa ya l'anya-unuphu l'anya-unuphu; me l'onu-egu l'onu-egu.

Alì ndu Nafutali

³²A byakwa atua ido k'ishii; o daaru Nafutali. Ephe haa ya l'anya-unuphu l'anya-unuphu.

³³Oke alì ono gbè le mkpukpu Helefu; waa le mgboru eze oshi Zanimu; ghata mkpukpu Adaminekebu; waa mkpukpu Jiabunelu; gbè l'eka ono lufu le mkpukpu Lakumu; kwaseru nno jasù l'enyimu Jiòdanu. ³⁴Oke alì ono bya agbajia uzo enyanwu-ariba ghabua mkpukpu Azunotu-Tabo; bya eshia futa le mkpukpu Hukoku. O bya erwua alì ndu Zebulunù l'uzo ndohali; waa kè ndu Asha l'uzo enyanwu-ariba; waa kè ndu Jiuda l'uzo enyanwu-awawa le mgboru enyimu Jiòdanu. ³⁵Mkpukpu, no l'alì eka ono, a kpù-pheru igbulò mgburugburu bu Zidimu; waa Zeru; waa Hamatu; waa Rakatu; waa Kineretu; ³⁶waa Adama; waa Rama; waa Hazo; ³⁷waa Kadeshi; waa Edereyi; waa Enu-Hazo; ³⁸waa Yironu; waa Migudalu-Elu; waa Horemu; waa Betu-Anatu; waa Betu-Shemeshi. Iphe, o kpakotaru du bu mkpukpu iri le tete; yee unwu mkpukpu, nogbaa phe mgburugburu.

³⁹Mkpukpu ono; yee unwu mkpukpu ono, no-pheru iya mgburugburu ono g'o ha tukoru bukotaru okiphe okpa-ipfu Nafutali l'anya-unuphu l'anya-unuphu; le mkpukpu le mkpukpu me l'onu-egu l'onu-egu.

Alì ndu Danu

⁴⁰Tobudu iya bu; a bya atua ido k'esaa; o daaru okpa-ipfu Danu.

⁴¹Mkpukpu, no l'alì ophu a nuru phe bu:

Zora; waa Eshutolu; waa Iru-Shemeshi; ⁴²waa Shalubimu; waa Ajialonu; waa Itula; ⁴³waa Elonu; waa Timuna; waa Ekuronu; ⁴⁴waa Eluteke; waa Gibe-tonu; waa Balatu; ⁴⁵waa Jiehudu; waa Bene-Baraku; waa Gatu-Rimonu; ⁴⁶waa Mejakonu; wafua Rakonu; wakwapho alì ophu no gha iphu le Jiopa.

⁴⁷Obenu le ndu Danu be alwuta alì nkephe tsuru l'ehu. Oo ya bu; ephe gbeshi je adatso ndu mkpukpu Leshemu ogu; lwu-kpee phe bya atuko phe gbushia; nata alì phe buru. Ephe je eburu le mkpukpu Leshemu; bya eworu mkpukpu ono gya epha nna phe oche, bu Danu.

⁴⁸Mkpukpu ono; yee unwu mkpukpu, no-pheru phe mgburugburu tukoru bukotaru okiphe okpa-ipfu Danu l'ipfu l'ipfu.

Alì Jioshuwa

⁴⁹⁻⁵⁰A tyebe ido gude washiaru ndu Izurelu alì ono g'ephe nworu ndu Izurelu bya eworu alì nu Jioshuwa nwa Nunu no l'echilabo phe. O

buerupho iphe, Chipfu sùru g'èphe mee bè èphe meru; mbù l'èphe nùeru iya phò èka ò tùru èka sù g'a nù iya. Alì, èphe nùru iya bù Timunatu-Sera, bù mkpùkpu, nò l'alì úbvú úbvú Ifuremu. Ò kpùkwaa mkpùkpu ono buru.

⁵¹Alì ono g'ò ha bè Eleyaza, onye uke Chileke; waa Jioshuwa nwa Nunu; waa ndu-ishi ndu Ízurelu l'òkpa-ipfu l'òkpa-ipfu nò l'atatiphu Chileke lè mkpùkpu Shilo; l'ònu-abata ùlo-èkwa-ndzukò tùa ido gude washìaru iya ndu Ízurelu. Ò buru ègube ono bù g'èphe gude kee alì ono g'ò ha keghee.

**Mkpùkpu, onye gburu nemadzù
a-nòduje ezeru ndzù**

(Ógú 35:9-34; Dìt 4:41-43; 19:1-13)

20 ¹Tòbudu iya bù; Chipfu sù Jioshuwa: ²“Pfiaru ndu Ízurelu g'èphe hòta mkpùkpu ono, aa-nòduje ezeru ndzù ono, mu shi l'ònu Mòsisu pfiaru unu ono; ³k'òphu bù: ò -dùru onye gburu nemadzù; èbe o lekebedùru ènya; l'ò gbaru laa èka ono je ezeeru ndzù; gè ndu nwe onye ono, e gburu ono te egude ènya-mee gbua ya gwata ùgwò òchi onye k'ono, e gburu ono.

⁴“Onye ono -nòdu agba ala lè mkpùkpu lanù lè mkpùkpu ono bù a -gbabe aadzùru ono; teke onye ono gbarwuerupho l'ònu-abata mkpùkpu ono; g'onye ono pfiukwaru l'èka ono dooru ndu bù ògerenya mkpùkpu ono iphe, darù nù. E -mecha; èphe edubata onye òbu lè mkpùkpu ono, nù iya alì; èka oo-buru. ⁵Ò -bùru l'ò nweru onye achì onye òbu g'ò melata iya; gè ndu bù ògerenya mkpùkpu ono ta ahakwa iya g'onye abya emelata òbu melata iya; noo kèlè o to lekebedùru ènya gbua onye òbu; tème òphu ò bùdu l'òpfi, shiwaa dùru èphe l'onye òbu. ⁶Onye ono ebua l'èka ono, ò gbaru laa ono gbiriri jasù teke òo-bya apfiuru l'iphu ndiphe; èphe ekpee ya ikpe. E -kpechaa ya ikpe; l'ò bukwarupho l'èka ono; jasù onye-ishi-uke Chileke, ejeru Chileke ozi teke ono anwùhu. Ono -mechaèpho; onye ono alashìwaro l'èka o shi buru lè mkpùkpu ono, ò gbè gbala gbaru lashà mkpùkpu a -gbabe aadzùru ono.”

⁷Òo ya bù; èphe hòta mkpùkpu Kadèshi, nò l'alì úbvú úbvú kè ndu Nafutali l'alì Gálili; waa mkpùkpu Shèkemu, nò l'alì úbvú úbvú kè ndu Ifuremu; waa mkpùkpu Kiriyatu-Araba, bù iya bù Hèburonu, nò l'alì úbvú úbvú kè ndu Jiuda. ⁸O -rwua l'ùzo ènyanwu-awawa ènyimu Jìòdanu; mbù baswaa alì, tù-koru l'eli úbvú, nò l'echiègu l'ùzo ènyanwu-awawa mkpùkpu Jieriko; èphe hòta mkpùkpu Beza, nò l'alì òkpa-ipfu Rúbènu; waa mkpùkpu Ramatu, nò l'alì Giladu l'alì k'òkpa-ipfu Gadu; waa mkpùkpu Golanu, nò l'alì Beshanu l'alì òkpa-ipfu kè Manàsé. ⁹Mkpùkpu ono g'ò hakòta bè a hòtaru doberu ndu Ízurelu; waa ndu bù nlwamùlwa; g'onye gburu nemadzù; òphu o lekebedùru ènya gbajèru laa; g'ò tò dù iphe, onye

eme g'ò gwata ụgwò ọchi onye ọzọ e-me iya; gbiriri jasụ teke onye ono a-pfuru l'iphu ndiphe g'e kpee ya ikpe.

Mkpụkpu ọpụ a nuru ndu Lívayi

21 ¹Noo ya; ndu-ishi ndu unuphu ndu Lívayi bya edzukọbe; wuru jepfu Eleyaza onye uke Chileke; waa Jioshuwa nwa Nunu; waa ndu-ishi ndu unuphu ndu Ízurelu ọpụ ²lẹ mkpụkpu Shilo l'alì Kéna-nu bya asụ pẹ: “Chipfu shikwa l'ọnu Mósísisu tụa ekemu sụ g'a nụ anyi mkpụkpu olemole g'anyi buru; wafua alì, iphe-edobe anyi a-nọduje ata nri.” ³Ọo ya bụ; ndu Ízurelu bya emee gẹ Chileke turu ekemu sụ g'ẹphe mee; bya eshi l'oke iya nkephẹ buta mkpụkpu; waa ẹka iphe-edobe pẹ a-tajẹ nri woru nụ oshilọkpa Lívayi.

⁴Ido kẹ mbụ, e vuru ụzọ tụa daaru oshilọkpa Kohatu l'ipfu l'ipfu. A nụ ndu Lívayi ndu ọpụ bụ oshilọkpa Eronu, bụ onye uke Chileke mkpụkpu iri l'ẹto, shi l'alì ọkpa-ipfu Jiuda; waa kẹ Simiyonu; waa kẹ Benjiaminu. ⁵Oshilọkpa Kohatu ndu ọpụ ghuduru nụ bẹ a nuru mkpụkpu iri, shi l'alì ọkpa-ipfu Ifuremu; waa kẹ Danu; wafua kẹ nkeru-ẹbo ọkpa-ipfu Manáse.

⁶Oshilọkpa Geshonu bẹ a nuru mkpụkpu iri l'ẹto, shi l'alì ọkpa-ipfu Isaka; waa kẹ Asha; waa kẹ Nafutali; waa nkeru-ẹbo ọkpa-ipfu Manáse, bu l'alì Beshanu.

⁷Oshilọkpa Merari l'ipfu l'ipfu bẹ a nuru mkpụkpu iri l'ẹbo, shi l'alì ọkpa-ipfu Rúbenu; waa kẹ Gadu; wafua kẹ Zebulun.

⁸Tobudu iya bụ; ndu Ízurelu bya atụa ido gude nụ ndu Lívayi mkpụkpu lẹ mkpụkpu nkephẹ; waa ẹka iphe-edobe pẹ a-tajẹ nri, bụ iya bụ gẹ Chipfu turu Mósísisu ekemu sụ g'e mee ya.

⁹⁻¹⁰A -gbe l'alì k'ọkpa-ipfu Jiuda; waa kẹ Simiyonu woru mkpụkpu-a, aabya agushia nụ g'ọ buru alì nkephẹ. Ndu a nuru iya bụ oshilọkpa Eronu, shi l'ipfu unwu Kohatu bụ ọkpa-ipfu Lívayi; kẹle ọpẹ bẹ ido mbụ vuru ụzọ daaru.

¹¹Ẹpẹ nuru pẹ alì kẹ mkpụkpu Kiriya-Araba, bụ iya bụ Hẹburonu; yẹle ẹka iphe-edobe a-tajẹ nri, nọ mkpụkpu ono mgburugburu. Hẹburonu ono nọ l'alì úbvú úbvú ndu Jiuda. Aba bụ nna oche Anaku. ¹²O be l'alì ẹgu; waa nwa mkpụkpu, nọ-pheru mkpụkpu ono mgburugburu; ẹpẹ woru iya nụ Kalebu nwa Jiefune g'ọ buru okiphe iya.

¹³Oshilọkpa Eronu, bụ onye uke Chileke bẹ a nuru mkpụkpu Hẹburonu g'ọ buru mkpụkpu ẹka onye gburu ọchi a-gbajeru laa je anodu; bya anụ iya mkpụkpu Libuna; ¹⁴waa Jiaturu; waa Eshutemowa; ¹⁵waa Holonu; waa Debi; ¹⁶waa Ayinu; waa Jiuta; wafua Betu-Shemeshi; yẹle ẹka iphe-edobe atajẹ nri, nọ-pheru iya mgburugburu. Mkpụkpu tete bẹ a wataru l'alì k'ọkpa-ipfu labọ k'ono.

¹⁷A bya l'alì k'ọkpa-ipfu Benjiaminu; a wee pẹ mkpụkpu Gibiyonu; waa Geba; ¹⁸waa Anatotu; waa Alūmonu; tẹme wakwaphọ ẹka

iphe-edobe ataję nri, nọ-pheru iya mgburugburu. Iphe, ọ dụ bụ mkpụkpu ẹno.

¹⁹Mkpụkpu, a nuru ndu-uke, bụ oshilọkpa Erọnu dụ iri l'eto; yee ẹka iphe-edobe phẹ a-taję nri.

²⁰Oshilọkpa Kohatu, bụ ọkpa-ipfu Lívayi ndu ọphu ghuduru nụ bẹ e butaru mkpụkpu olemole l'alị kẹ Ifuremu nụ.

²¹Alị úbvú úbvú Ifuremu bẹ e butaru mkpụkpu Shẹkemu; nụ phẹ g'ọ buru ẹka onye gburu ọchi a-gbajęru laa je anọdu; waa Geza; ²²waa Kibuzayimu; waa Bẹtu-Horonu; tẹme yee ẹka iphe-edobe phẹ a-taję nri, nọ-pheru iya mgburugburu. Iphe, ọ dụ bụ mkpụkpu ẹno.

²³Ọkpa-ipfu Danu nụ phẹ Eluteke; waa Gibetọnu; ²⁴waa Ajjalọnu; wafuą Gatu-Rimonu; yee ẹka iphe-edobe phẹ a-taję nri, nọ-pheru iya mgburugburu. Iphe, ọ dukwapho bụ mkpụkpu ẹno.

²⁵E shi lẹ nkeru-ẹbo ọkpa-ipfu Manáse, woru Tanaku nụ phẹ; bya anụ phẹ Gatu-Rimonu; yele ẹka iphe-edobe phẹ a-taję nri, nọ-pheru iya mgburugburu. Iphe, ọ dụ bụ mkpụkpu labọ.

²⁶Mkpụkpu iri ono; yee ẹka iphe-edobe ataję nri ono bẹ a nuketaru oshilọkpa Kohatu ndu ọphu ghuduru nụ.

²⁷Waa mkpụkpu, a nuru oshilọkpa Lívayi, bụ ipfu unwu Geshonu baa:

Ọkpa-ipfu Manáse, be e keru ẹbo nụ phẹ Golanu, nọ l'alị Beshanu g'ọ buru ẹka onye gburu ọchi a-gbajęru laa je anọdu; waa Beshitera; yee ẹka iphe-edobe phẹ a-taję nri, nọ-pheru iya mgburugburu. Iphe, ọ dụ bụ mkpụkpu labọ.

²⁸Ọkpa-ipfu Isaka nụ phẹ Kishonu; waa Daberatu; ²⁹waa Jiarumutu; wafuą Enu-Ganimu; yee ẹka iphe-edobe phẹ a-taję nri, nọ-pheru iya mgburugburu. Iphe, ọ dụ bụ mkpụkpu ẹno.

³⁰Ọkpa-ipfu Asha nụ phẹ Mishalu; waa Abudonu; ³¹waa Hẹlukatu; waa Rehobu; tẹme wakwaphọ ẹka iphe-edobe phẹ a-taję nri, nọ-pheru iya mgburugburu. Iphe, ọ dụ bụ mkpụkpu ẹno.

³²Ọkpa-ipfu Nafutali nụ phẹ Kadęshi, nọ l'alị Gálili g'ọ buru ẹka onye gburu ọchi a-gbajęru laa je anọdu; waa Hamotu-Doru; wafuą Katanu; yee ẹka iphe-edobe phẹ a-taję nri, nọ-pheru iya mgburugburu. Iphe, ọ dụ bụ mkpụkpu ẹto.

³³Mkpụkpu ọphu a nuru ipfu unwu Geshonu ẹphe kee l'ęnya-unuphu l'ęnya-unuphu dụ iri l'eto; yele ẹka iphe-edobe phẹ a-taję nri, nọ-pheru iya mgburugburu.

³⁴Waa mkpụkpu, a nuru oshilọkpa Lívayi ndu ọphu ghuduru nụ, bụ ipfu unwu Merari baa.

Ọkpa-ipfu Zebulonu nuru phẹ Jiokuneyamu; waa Kata; ³⁵waa Dịmunu; wafuą Nahalolu; yee ẹka iphe-edobe phẹ a-taję nri, nọ-pheru iya mgburugburu. Iphe, ọ dụ bụ mkpụkpu ẹno.

³⁶ Ọkpa-ipfu Rúbenu nù phẹ Beza; waa Jiahazu; ³⁷waa Kedemotu; wafua Mefahatu; yee ẹka iphe-edobe phẹ a-tajẹ nri, nọ-pheru iya mgburugburu. Iphe, ọ dọ bụ mkpukpu ẹno.

³⁸ Ọkpa-ipfu Gadu nù phẹ Ramatu, nọ l'alị Giladu g'ọ buru ẹka onye gburu ọchi a-gbajeru laa je anọdu; bya anukwa phẹ phọ Mahanayimu; ³⁹waa Heshibonu; tẹme waa Jiaza; yele ẹka iphe-edobe phẹ a-tajẹ nri, nọ-pheru iya mgburugburu. Iphe, ọ tukuru dọ bụ mkpukpu ẹno.

⁴⁰ Mkpukpu ophu a nuru ipfu unwu Merari, bụ phẹ bụ oshilokpa Lívayi ndu ophu phoduru nù; dọ iri l'ẹbo.

⁴¹ Mkpakota mkpukpu, a nuru oshilokpa Lívayi l'ime alị ndu Ízurelu dọ ukporo mkpukpu labo lẹ mkpukpu ẹsato; yele alị ẹka iphe-edobe phẹ a-tajẹ nri. ⁴² Mkpukpu ono g'ọ hakota iche iche bẹ nwekotacharu ẹka iphe-edobe a-tajẹ nri nọ-phechaaru iya mgburugburu.

⁴³ Ọo ya bụ; Chipfu nukota ndu Ízurelu alị ono, o riburu ndiche phẹ angu l'ọo-nù phẹ ono; ẹphe je alwuta alị ono buru. ⁴⁴ Chipfu mee; ophu ọ duedu ndu emekpakwadu phẹ ẹhu, bụ iphe, o kweru ndiche phẹ ukwe sù lẹ ya e-meru phẹ. Ophu ọ duedu ndu ohogu phẹ, duru ndu ophu adujekwadu ike gbelia ishi l'ẹka ẹphe nọ. Chipfu wokotaru ndu ohogu phẹ ono g'ẹphe ha yekota phẹ l'ẹka. ⁴⁵ Ophu ọ dudu iphemiphe, dọ ree ono, Chipfu kweru ndu Ízurelu ukwe iya ono, duru ophu o meduru phẹ. Ọ tukuru iya g'ọ ha mekotaru phẹ.

22 ¹ Noo ya; Jioshuwa bya ekukobe ndu Rúbenu; waa ndu Gadu; waa ndu Manáse ibe lanu; ² bya asu phẹ: “Nta bẹ unu mekotawaru iphe, Mósisu, bụ onye-ozí Chipfu turu unu ekemu sù g'unu mee; tẹme unu ngabekotaru yẹbe Jioshuwa nchị mekota iphe, ya ziru unu g'ọ ha. ³ E-shi teke ama byasu ntanu-a bẹ unu ta ahaduru unwunna unu; unu letakpọepho ẹnya je ozi, Chipfu yeru unu l'ẹka. ⁴ Nta-a, Chipfu mewaru iphe, o kweru ukwe iya-a; bya emee; ophu ọ duedu ndu akpakwadu unwunna unu ẹhu-a; bukwa g'unu lashiwaro ibe unu l'alị ono, Mósisu onye-ozí Chipfu nuru unu l'azu ẹnyimu Jiódanu azu iya ophuu. ⁵ Ọle g'unu letakwa ẹnya meje iphemiphe ono, Chipfu suru g'emeje; yele ekemu iya ono, Mósisu turu nù unu ono, bụ iya bụ g'unu yee Chipfu, bụ Chileke unu obu; shije iphe, bukpo ọzo, ọ suru g'unu shije; tukota ekemu iya g'ọ ha mekota. Tẹme unu achiru upfu kwẹe l'ẹka ọ nọ gude obu unu g'ọ ha ejeru iya ozi.”

⁶ Jioshuwa bya agochaaru onu-oma nù phẹ; bya edufu phẹ; ẹphe wufu; ọ buru phẹ ala ibe phẹ. ⁷ Ọkpa-ipfu Manáse ibe lanu bẹ Mósisu nuru alị lẹ Beshanu; Jioshuwa bya anu ibe lanu k'ophuu alị l'ẹka ọ nuru unwunna phẹ alị l'azu ẹnyimu Jiódanu azu iya ophuu l'uzo ẹnyanwu-ariba. Jioshuwa bya akarụ phẹ g'ẹphe lashia bya agoru onu-oma nù phẹ ⁸ sù: “Unu tukochaa gude ẹku unu, paru ẹka lashichaa ibe unu; mbu me igwe iphe-edobe unu; me mkpola-ochaa unu; me mkpola-ododo unu; me onyirubwu unu; me igwe unu; mekpoo ẹkwa unu, paru ẹka. G'unu l'unwunna unu kekwa iphe ono, unu kwataru l'okwata l'alị ndu ohogu unu ono.”

⁹Ọo ya bu; ndu Rúbenu; waa ndu Gadu; waa ndu Manáse ibe lanu haa ndu Ízurelu le Shilo, no l'alì Kénanu lashia alì Giladu, bu alì nkephe, bu iya bu alì ono, Chipfu turu ekemu su ge Mosisu nu phe ono.

¹⁰Noo ya; ephe jerwuepho mkpukpu Gelilotu le mgboru enyimu Jiódanu l'alì Kénanu; ndu Rúbenu; waa ndu Gadu; waa ndu Manáse ibe lanu bya eworu oru-ngweja, ha shii kpua le mgboru enyimu Jiódanu l'eka ono. ¹¹Tobudu iya bu; ndu Ízurelu numaeopho l'ephe kpuru oru-ngweja le mkpukpu Gelilotu, bu oke alì Kénanu le mgboru enyimu Jiódanu l'azu iya ke ndu Ízurelu azu iya-a; ¹²ndu Ízurelu l'ophu bya edzukobe le mkpukpu Shilo g'ephe je etso phe ogu.

¹³Ọo ya bu; ndu Ízurelu bya ezia Finehasu, bu nwa Eleyaza, bu onye uke g'o je l'alì Giladu; jepfu ndu Rúbenu; waa ndu Gadu; waa ndu Manáse ibe lanu. ¹⁴Ephe bya eyeru iya ndu-ishi umadzu iri; umadzu iri ono shicha l'okpa-ipfu ndu Ízurelu nanunanu. G'ephe ha buchaa ru ishi l'enya-unuphu, ndu Ízurelu l'ehu l'ehu.

¹⁵Ephe jerwuepho Giladu jepfu ndu Rúbenu; waa ndu Gadu; waa ndu Manáse ibe lanu bya asu phe: ¹⁶“Ndibe Chipfu l'ophu sukwaru: ‘?Denu g'o nwuru unu mebyiru ekemu, Chileke turu? Mbú; ?denu g'o nwuru unu gbakutaru Chipfu azu je akpuaru onwunu oru-ngweja; shi nno kwefuru iya ike? ¹⁷?Iphe-eji, anyibe ndu Ízurelu meru le mkpukpu Peyo teke ahudu anyi ahuhu? O kwa l'unu maru l'eshi teke ono byasu nta-a be anyi teke aduebedu ree le k'iphe-eji ono; mbukponu je akpaa le g'ejo ahuma-a dafputachakporu anyi ono. ¹⁸?Unu towaa nwehu akpo geegeegee akpofu l'eka Chipfu to?”

“Unu makwaru l'o -buru l'unu kwefuru Chipfu ike ntanu-a be o -rwutashia echele be Chipfu tukoshiakwaru anyibe ndu Ízurelu l'ophu oke ehueghu iya. ¹⁹O -buru l'o du unu g'alì nkunu be e merwushiwaru; unu lwakwa l'alì ke Chipfu l'azu iya-a; l'eka ulo-ekwa ke Chipfu no g'anyi l'unu tukoburu. Unu ta akpushiru onwunu oru-ngweja, abudu oru-ngweja Chipfu, bu Chileke anyi; shi nno kwefuru Chipfu; waa anyibedua ike. ²⁰Teke ono, Ekanu nwa Zera mebyiru ekemu, Chipfu turu le k'iphe, duru iya nso ono; ?Chipfu ta atukoshiduru ndu Ízurelu l'ophu oke ehueghu iya to? O to bukwapho yebedua nwekinyi iya be nwuhuru nu.’”

²¹Noo ya; ndu Rúbenu; waa ndu Gadu; waa ndu Manáse ibe lanu su ndu-ishi ndu Ízurelu: ²²“Chipfu, bu Chileke; bya aburu Okalibe-Kakota-Ike makwaru! Mbú le Chipfu, bu Chileke; bya aburu Okalibe-Kakota-Ike tukokwaru iphemiphe maeberu. G'unube ndu Ízurelu makwaru iya pho! L'o to budu iphe, anyi gude kpua ya bu l'anyi eme g'anyi kwefuru iya ike. Ọo ya bu le teke unube ndu Ízurelu mecharu bya amaru l'iphe, anyi gude kpua ya bu g'anyi kwefuru Chileke ike; unu tukoeopho anyi gbushigbua ntanu-a. ²³Ozoo; o -buru l'iphe, anyi gude kpua oru-ngweja l'eka anyi; bu g'anyi gwaje iya agwagwa; g'anyi shi nno gbakutaru Chipfu azu; wata iya

anụ ngweja-akpo-oku; ozoo ngweja-nri; ozoo ngweja-ehu-guu; ge Chipfu gwatakwa anyi ugwo iya l'onwiya!”

²⁴Su: “Waaakwa! Liphe, anyi gude mee ya bukwa ndzu-agugu. ?A maru ?to budunu; a -nonyaa; awa unu asu lephe e-bufu anyi su lo to dudu iphe, anyi le Chipfu, bu Chileke ke ndu Izurelu jigba? ²⁵Mbu; ephe asu le Chipfu mewaru; oke anyi l'unu buru enyimu Jiordanu; l'anyi be ndu Rubenu; waa ndu Gadu be ta agbadu le Chipfu. Oo ya bu; eshi nno; awa unu emee awa nkanyi ababuhuru Chipfu eja.”

²⁶Su: “O kwa iphe, meru g'o gude anyi kpu oru-ngweja bu ono. O to bukwa iphe, anyi kpu-doru iya bu g'anyi egweahaa ngweja-akpo-oku; ozoo ngweja ozo l'eli iya. ²⁷Iphe, anyi kpu-doru iya bukwa g'o buru iphe, a-nodu agba anyi l'unu ekebe; waa ogbo ophu no l'iphe; l'anyi e-gudeje ngweja-akpo-oku; waa ngweja-ehu-guu; wafua ngweja ozo bya abaarụ Chipfu eja l'ulo iya, du nsu. G'o to dukwanu teke bu: a -nonyaa; awa unu asu k'anyi bedua l'anyi l'unu ta agbadu le Chipfu.

²⁸“A -ta asu; o -buru la nonyaru awa unu pfuaru anyi; ozoo unwu anyi nno; oo ya bu g'anyi bedua asukwanu phe: ‘Unu humakwa oru-ngweja ophu ephe le ke Chipfu gba nanu; mbu ophu nna anyi oche phe kpu l'onwophe. Ole anyi ta akpukwaru iya g'anyi egwejeru Chipfu ngweja-akpo-oku; ozoo ngweja ozo l'eli iya; obenu l'anyi kpu iya g'o buru iphe, a-nodu agba anyi l'unu ekebe.’

²⁹“Tuswekwa! Anyi ta abyadu ekwefuru Chipfu ike; ophu anyi abyakwa aha etso uzo iya; je akpu oru-ngweja ozo, ee-gweje ngweja-akpo-oku; ozoo ngweja-nri; ozoo ngweja ozo; abudu oru-ngweja Chipfu, bu Chileke anyi ono, no l'atatiphe ulo-ekwa iya ono.”

³⁰Tobudu iya bu; Finehasu, bu onye uke; waa ndu-ishi ndu Izurelu, bu phe bu ndu-ishi, shigbachaa le ndu unuphu ndu Izurelu numae pho iphe, ndu Rubenu; waa ndu Gadu; waa ndu Manase pfuru; ehụ tsoahaa phe utso. ³¹Noo ya; Finehasu, bu nwa Eleyaza, bu onye uke bya eyeru ndu Rubenu; waa ndu Gadu; waa ndu Manase onu su phe: “Nta-a be anyi mawaru le Chipfu no swiru anyi; noo kele unu te emebyiduru ekemu Chipfu. Nta-a be unu nafutawaru anyibe ndu Izurelu l'eka Chipfu.”

³²Oo ya bu; Finehasu, bu nwa Eleyaza, bu onye uke; waa ndu-ishi gbę l'alı Giladu eka ephe le ndu Rubenu; waa ke Gadu shi nodu ndzuku ono lashja alı Kėnanu je akooru ndu Izurelu g'ephe jeru. ³³Ephe numachaa g'ephe jeru iya; ehụ tsoo phe ntumatu; teme ephe bya ekele Chileke ekele. Ephe gbę teke ono gbütoshia eka k'eye etso ndu Rubenu; waa ke Gadu ogu; mbu ogu, ephe shi akwakobe g'ephe je etso phe; mebyishia alı phe.

³⁴Ndu Rubenu waa ndu Gadu bya eworu epha gua oru-ngweja ono. Iphe, ephe guru iya bu: “Iphe, agba anyi ekebe le Chipfu bu Chileke.”

Ekpe, Jioshuwa eke anu ndu Izurelu

23 ¹A nonyapowaro ge Chipfu mechaaru; ehụ du ndu Izurelu guu; ophu o duedu ndu ohogu phe akpakwadu phe ehụ; ge Jioshuwa

kahukpowaru ke libaliba. ²O -rwua ujiku lanu; o kukobe ndu Izure-lu g'ephe ha. O kuru ndu bu ogerenya phe; waa ndu-ishi; waa ndu-ikpe; waa ndu ozo, dugbaa mkpa bya asu phe: "Nta be mu buwaa ogerenya; teme mu kapfuhuchawa akapfuhu. ³Unubedua gudewaa enya unu huma iphemiphe, Chipfu, bu Chileke unu meru ohamoha-a l'opfu ehununu. Oo Chipfu ono, bu Chileke unu ono bu onye lwu-chiteru unu ogo. ⁴Unu nyatakwa ge mu gude washjaru unu ali ndu k'ono, e teke alwutadu; waa ali ndu k'ono, mu lwutawaru ono; mbu ali ono, no le mgbaka enyimu Jiodanu yee Eze Enyimu, no l'uzo enyanwu-ariba ono. ⁵Oo Chipfu, bu Chileke unu lonwiya be a-chifuru phe unu; chia phe g'ephe banoduhe latatiphu unu. Unu anata iya; lo buru ali unu, bu iphe, Chipfu, bu Chileke unu kweru unu ukwe iya.

⁶"Unu dekwa enya le mini tuko iphemiphe, e deru lekwo ekemu Mosisu mekota; ebe unu agbakutakwaru iya azu shia uzo eka-icha; ozoo ekutara. ⁷G'o to dukwa iphe, unu l'oha, ghuduru nu, bukube unu e-megbaje me ililekpo. Unu te epfujekwa mabeeru agwa phe; ophu unu egudejekwa phe ria angu. Unu te ephozejekwaru agwa phe ono; ophu unu abajekwaru phe aja. ⁸O buchia g'unu chiru upfu kwee le Chipfu, bu Chileke unu; egube ono, unu shi teke ama meta byasu nta-a ono.

⁹"Chipfu chishiru unu oha, hagbaa shii, okpehu pagbaar uka. Eshi teke ono byasu ntanu-a ta adukpodaa oha ophu dujeru ike pfuru wota unu ogo. ¹⁰Onye lanu l'ime unu be a-du ike chishia aguta aguta nemadzu; noo kele Chipfu, bu Chileke unu anoduje alwu-chiru unu ogo, bu iphe, o kweru unu ukwe iya. ¹¹Oo ya bu; g'unu pfushikpoephe ike l'eye Chipfu, bu Chileke unu obu g'unu yeru iya.

¹²"Obenu lo -buru l'unu nonyaaru gbakuta iya azu; bya eje; unu l'oha owa, a lwu-phodoru-a tugba buru nanu; ozoo l'unu lephe wataru alugba nwanyi; wata emegbaa l'iphemiphe; ¹³unu makwaru le Chipfu, bu Chileke unu be taa achifuekwaru unu oha ono. O chia iphe, e-me nu bu lephe a-buru onya nmata unu. Ephe aburu echachi, ee-mechaa gude ahununu ahuhu; bukwarupho obvu, a-nodu adzukashi unu lehu; gbiriri jasuteke unu a-tuko buru mkpurupyata leguru ali ono, Chipfu, bu Chileke unu nuru unu ono.

¹⁴"O gbabewaru mu l'alala, bu iphe, duru ndiphe l'ophu. Unu gudewaa obu; waa uche unu maru lo to dudu iphe, Chipfu, bu Chileke unu kweru ukwe iya, duru ophu o mephodoru unu me nanu. O tukoru ukweiphe ono go ha mekota. Ophu o dudu go ka mma l'oo nanu, o haru; o laa ke mmanu. ¹⁵Ole o kwa egube ono, iphe, du ree, Chipfu, bu Chileke unu kwekotaru ukwe iya vukotaru ono; bukwaphe g'ejo-iphe, Chipfu pfuru unu opfu iya ono a-vukota; bya atuko unu mebyishikota leguru ali-a, o nuru unu-a; ¹⁶m'o buru l'unu mebyiru ekemu, du logbandzu ono, unu le Chipfu gbaru ono. O -buru l'unu jeru ephozeaharu agwa ishi bya

abaaharu phe eja be Chipfu a-tu-koshikwa unu oke ehu-eghu iya; ophu o dukwa g'unu a-no-beru; unu aburu mkpurupyata l'eguru ali ono, Chipfu nuru unu g'unu buru ono.”

Ozi ikpazu, Jioshuwa ziru ndu Izurelu

24 ¹Noo ya; Jioshuwa bya ekukobe okpa-ipfu ndu Izurelu l'ophu; epe dzugbua le mkpukpu Shekemu. O bya ekugbua ndu bu ogerenya; waa ndu-ishi; waa ndu-ikpe; waa ndu ozo, dugbaa mkpa, shi le ndu Izurelu; epe dzugbua l'iphu Chileke.

²Jioshuwa su ndu ono g'ephe ha: “Wakwa iphe, Chipfu, bu Chileke ke ndu Izurelu epfu baa: “Teke ndiche be nna unu oche phe; shi abaru agwa eja; je akpachaa le Tera, bu nna Ebirihamu; waa Nahu; shi buru l'azu enyimu Yufuretis azu iya ophu. ³Obenu le mu dufutaru nna unu, bu Ebirihamu l'ali ono, no l'azu enyimu azu iya ophu ono; bya edua ya; o jedzukotaru ali Kenanu l'ophu; teme mu mee ya; o nweru awa, du igwerigwe. Mu nuru iya Ayizaku; ⁴bya emee; Ayizaku nwuta Jieko; yee Iso. Mu woru ali ubvu ubvu Siye nu Iso; obenu le Jieko yee unwu iya laru ali Ijiputu.

⁵“Mu zia Mosisu yee Eronu ozi; bya egude phe mee ndu Ijiputu; epe jee iphe-ehuka; shi nno dufuta unu l'eka ono. ⁶Teke mu dufutaru nna unu phe l'ali Ijiputu be epe rwuru eze-enyimu. Epe bya ele enya; ndu Ijiputu gudewaa ugbo-inya; waa ndu agba l'inya achi phe; epe chia phe jasu le Eze-enyimu Uswe-uswe. ⁷Obenu l'ephe rakuru Chipfu su g'o dzoo phe. O woru ochii dobe le mgbaka nna unu phe le ndu Ijiputu. O chiru phe ye l'oma eze-enyimu; o woru phe ria. Unu gude enya unu huma iphe, mu meru ndu Ijiputu. E mechaa; unu buru l'echiegu noo odu.

⁸“Mu dua unu; jasu l'ali ndu Amoru, bu ndu shi buru l'uzo enyanwu-awawa enyimu Jiodanu. Epe bya etsoo unu ogu; obenu le mu wotaeru phe pho ye unu l'eka; mbu woerupho nkephe meghee l'atatiphu unu; unu nata ali phe; o buru nkunu. ⁹Teke ono, Belaku nwa Zipo, bu eze ndu Mowabu kwakoberu g'o bya etsoo ndu Izurelu ogu; be o ziru g'e je ekuaru iya Belamu nwa Beyo g'o bya atua unu onu. ¹⁰Obenu le mu ta ngabeduru Belamu nchi; o buru iphe ono kparu iphe, o wataru agoru unu onu-oma; o -gochaa l'o gobaa; mu shi nno nafuta unu l'eka iya.

¹¹“Noo ya; unu dachaa enyimu Jiodanu; bya abyarwuta mkpukpu Jieriko. Ndu bu le Jieriko tsoo unu ogu. Ndu Amoru; waa ndu Perezu; waa ndu Kenanu; waa ndu Hetu; waa ndu Gigashi; waa ndu Hevu; wafua ndu Jiebusu bya etsokwapo unu ogu. Obenu le mu tukoru phe g'ephe ha yekota unu l'obochi-eka; unu l'wukpee phe. ¹²Mu ziru kirikiti-mgbo g'o vutaru unu uzo ogu; o buru iya chifuru phe unu; teme unu byarwuta; mbu je akpachaa ndu-eze labo, shi buru ndu-eze ndu Amoru pho. Noo kele o to budu ogu-echi; ozoo apfu unu be unu gude mee ya. ¹³Mu nuru

unu alì, unu te seduru akanya iya; mbù mkpùkpù, abùdu unu gude ẹka unu kpà ya. Unu bya eburu l'ime iya eri iphe, shi l'akpùru vayìnu, unu ta akùduru; bya eri iphe, shi l'oshi olivu, unu eyeduru l'onwunu.'

14 "Nta bükwa g'unu tsujè Chipfu ebvu bajeru iya ẹja. Unu tuphashikò-ta nshi, nna unu oche phẹ shi abarù ẹja l'azù ẹnyimù Yufurétisù azù iya ọphuu; wafù l'alì ndu Ijiputu; wata ejeru Chipfu ozi. 15 Obenu ọ -buru l'ejeru Chipfu ozi dù unu ẹji; ọọ ya bù; unu ahatawarọ onye ọphu unu a-nọdu ejeru ozi ntanù-a: l'agwa ọphu nna unu oche phẹ shi abarù ẹja l'azù ẹnyimù; l'agwa kẹ ndu Amọru, bù ndu ọphu shi buru l'ẹka unu bu-a. Obenu lẹ mbèdua; waa ndibe mu l'ọphu; bükwa Chipfu bẹ anyi a-nọdu ejeru ozi!"

16 Ndu Ízurelù tùko pfua sù: Tùswekwa! "Anyi ta abyakwa aha Chipfu je ẹjeahaaru agwa ozi. 17 Ọo Chipfu, bù Chileke l'onwiya bẹ dufutaru anyi; waa nna anyi oche phẹ l'alì ndu Ijiputu; ẹka anyi shi buru ohu. Ọ bya emeshigbaa iphe, dù biribiri anyi hùma. Ọ buru yẹbedua bù onye gbochiteru anyi l'ẹka ọhamoha, anyi ghakọtaru teke anyi nọ l'ije ono. 18 Tẹme Chipfu bya achifuru anyi ọhamoha; waa ọha kẹ ndu Amọru-a, shi buru l'alì-a. Anyìbedua a-tùkokwapho jeeru Chipfu ozi; noo kẹle ọọ ya bù Chileke anyi."

19 Jioshuwa sù phẹ: "Unu taa adùkwa ike ẹjekọtaru Chipfu ozi; noo kẹle ọọ Chileke, dù nsọ; tẹme ọphu ọ dùkwa onye ookweje g'o koo ya ọkpa l'ishi. Ọ tọo hakwa unu kẹ mmanù mẹ unu kwefuru iya ike mee iphe-ẹji. 20 Ọ -buru l'a nọnyaaru; unu gbakùta Chipfu azù; bya awata ejeru agwa ndu ọhozo ozi; bẹ Chipfu a-ghakòbekwa meka unu iphe; mekwaaphọ unu achìhu lẹ g'oomẹbechaerupho unu ree ono."

21 Obenu lẹ ndu Ízurelù sùru Jioshuwa: Waawaa-o! Anyi a-nọdu-a abarù Chipfu ẹja-o!

22 Noo ya; Jioshuwa sù phẹ: "Unu bükwaa ekebe onwunu l'unu họtaru l'unu a-nọdu abarù Chipfu ẹja."

Ephe tùko sù: "Ee; anyi bùwaa ekebe onwanyi."

23 Jioshuwa sù phẹ: "Nta bükwa g'unu tùko agwa unu g'ọha lwà; unu eworu obu unu nù Chipfu, bù Chileke kẹ ndu Ízurelù."

24 Ndu Ízurelù tùko sù Jioshuwa: "Anyi a-bajeru-a Chipfu ẹja bya anga-bejeru iya nchì mee iphe, ọ sùru g'anyi mee."

25 Ọ buru mbọku ono bẹ Jioshuwa yẹe ndu Ízurelù nọ lẹ Shẹkemu gbaa ndzù; tẹme ọ tọaru phẹ ekemu; karù phẹ iphe, ẹphe e-meje. 26 Ọ bya atùko iphemiphe ono dekọta l'ẹkwo ekemu Chileke; tẹme ọ pata mkpuma, ha shii pfùbe l'upfu achì, nọ-kube ọlọ, dù nsọ kẹ Chipfu.

27 Ọ sùbechaa ya; bya asù ndu Ízurelù g'ẹphe ha: "Mkpuma-a a-nọdu agba anyi ekebe. Ọ tùkòwaru iphemiphe, Chipfu pfuru anyi nùmakota. Teke e mecharu; ọphu unu emeèduru iphe, unu kweru Chipfu ukwe iya; mkpuma ono agbaa unu ẹjo ekebe!"

Anwùhu Jioshuwa

²⁸Noo ya; Jioshuwa parù phẹ haa; ẹphe lashĩa. Onyenọnu lashĩa ibe iya ọphu a wẹru phẹ.

²⁹E meẹbechaepho iphemiphe ono; Jioshuwa nwa Nunu; onye ejeru Chipfu ozi; nwùhu g'ọ nọchaaru ọkporo apha ise l'apha iri. ³⁰E lia ya l'ẹka a nuru iya alì; mbù lẹ mkpụkpu Timunatu-Sera l'alì úbvú úbvú ndu Ifuremu l'uzo ndẹgu úbvú Gashì.

³¹Ndu Ízurelù bakọtakpoerupho Chipfu ẹja lẹ teke Jioshuwa; waa ndu bụ ọgerenya, gude ẹnya phẹ hụma iphemiphe, Chipfu mekọtaru ndu Ízurelù; nọkwadu ndzụ.

³²Ọkpu Jíósefu, ndu Ízurelù shi lẹ Ijiputu chiru bẹ ẹphe liru lẹ mkpụkpu Shẹkemu l'alì, Jiékoju zuru unwu Hamọ, bụ nna Shẹkemu l'ọkporo mkpọla-ọchaa ise. Ẹka ono mechawarọ bụru alì k'oshilọkpa Jíósefu.

³³Tẹme Eleyaza, bụ nwa Erọnu nwùhu; e lia ya lẹ mkpụkpu Gibiya, bụ ẹka a wẹru nwa iya, bụ Finehasu l'alì úbvú úbvú ndu Ifuremu.